

重刻桂翁詞序

元相桂翁詞六卷初刻於吳郡再刻於鉛山三刻於閩中每刻成則新譜復出公盛德大業天下具瞻片紙隻字散落人間莫不爭先快覩貴如璠璧至是陳生堯文又得鷓鴣園新曲併前六卷並刻以傳知儀嘗受公恩紀因以相示儀謂公以伊周之才遭逢



堯舜之主制作在

朝廷勲業在海內威名在四夷儀昔為  
公屬史凡邦國之事靡不奔走攀附  
仰觀一時

君臣際會禮遇絕席未嘗不私竊稱  
慶以為唐虞之感不是過也今雖廢棄  
草莽宗服令德長懷永慕而不能贊  
為一辭獨公嘗濫及二詞今二載在卷

中散因公意序次其說儀聞之風雅  
變而為離騷離騷變而為樂府自  
漢而上以樂馮音故風雅為什悉可  
被之管弦唐初歌詞猶用五七言詩今  
其存者必須雜以虛聲乃不入調故  
唐中葉始變而為長短句蓋按拍馮  
聲以成其調是則古之樂由人聲生後  
世詞曲用以譜樂宋子所謂亦依聲者



是也古樂之猶存者篇章在風雅義  
理在樂經至於名物度數悉散失而  
無傳焉君子蓋深惜之今世詞調相傳  
輕重疾徐抑揚頓挫雖不能盡合於  
古而六皆不出於六宮十一調之外昔賢  
謂五音為天音八聲為天化後之君子  
苟能因詞以尋調因調以審天音因天  
音以盡天化則古樂之遺響將庶幾

其得之矣自唐以下名儒碩德皆嘗  
留意而不廢者殆亦有見於斯乎竊  
嘗三復公卷中諸篇典雅沉重得之  
宮調風流醞藉得之大小石鍵淒激  
梟得之雙調清新縣邈得之仙呂感  
歎悲傷得之高角惆悵雄壯得之正  
宮或發而為富貴妙適或發而為  
飄逸深玄條暢澗漾終不失古樂之



遺聲公昔示儀詞中語所謂詞場三昧妙理難傳者真獨得之矣是故衣冠文會所不能無壯士遊寓所不能少鄉雲晨玉汝之歌似亦難為軒輊也往在壬寅歲儀繆領霸州之

命公屬詞書扇以為贈言時方夜暑使至拜辱於今司成程舜敷座中執燭誦之一闋既終坐客皆歎欬動色再

歌之涼颯蕭然左右皆掩泣而走明日篇章遂傳布都下兒童與皂皆能歌之乃知禮樂之化入人深而感人速至於如此公之再

名入相也道過吳門以疏草多手卷詞曲二卷示儀儀仰而歎曰我

朝中與一代制作明備盡在疏中可以方之周禮其事則廟廊之大典儀班



其人不取僭言至若此詞公愀時戀  
國之忠進退審擇以正

君臣始終以義悉具無遺遠追風雅而  
近方詩史諷詠其辭光霽在目世之  
學者蓋不待親承德教而平生大  
畧可仰思過半矣豈特鏤玉雕瓊  
與古今詞家相為比擬者哉此又誦  
公詞者所當知也刻既成敬書其

末

嘉靖丙午二月朔旦門人常熟楊儀  
再拜謹序



玉堂餘興引

自風雅湮而古詩亡樂經燔而諸調作詞也者  
 固六義之餘而樂府之流也比聲成音亦自與  
 政相通而能使人興起故曰今之樂猶古之樂  
 也桂洲公歷諫垣詞苑進秩宗以登元相文章  
 禮樂固已達之天下矣乃復於賡歌之暇感事  
 述情發玄摘藻而製為詞調久之成帙因命曰  
 玉堂餘興云余邑鉛山令朱侯選將刻以傳徵  
 家引之簡端余展讀之和平慷慨蘊藉敷揚其  
 諸忠愛懇惻之誠協恭規諭之義蓋颯颯乎溢



於言表而誇物著倫考衷協度又非特寄興焉  
爾也若其中美涇野之有道美後渠之不通政  
府則公之好尚又因是益昭矣昔漢武帝命司  
馬相如李延年輩采新聲諧音律下樂官掌記  
今觀其所陳未免矯誕囉雜唐自李白而下率  
多填詞慢調迨宋益靡厥能引括風雅以不失  
乎古之遺音則自永叔子瞻希文元晦之外不  
多見也乃今僅見斯帙耳是雖公之緒藝固亦  
可傳也已

嘉靖辛丑夏六月朔

賜進士出身通議大夫南京吏部右侍郎前國  
子祭酒春坊

太子庶子兼翰林侍講掌翰南院同修

國史 經筵講官鍾石費案著



少傅桂洲公詩餘序

予自歸田不通朝貴之問者將十年少傅桂洲公獨念一日之雅悉以登仕以來奏議應制諸集十餘卷見寄讀之未嘗不歎公啓沃之忠籌畫之精而一時

明良遭逢之盛也今年冬巡按侍御陳君蕙以公詩餘命吾郡守王侯儀刻焉俾予序之予曰一鴈老矣何足以知公哉夫天之生才甚難才而遇尤難惟公性度凝重智識高明而又濟之以淹貫古之明適體用之學是以下筆千言曾



不構思隨材應物無有凝滯殆天有意於  
聖皇制禮作樂一新中興之治而間世之英所  
以生也區區文字之餘以此而窺公抑末矣而  
况於茲集也哉雖然古之賢士藉之以陶寫性  
情固不廢也李太白兩詞之後歐陽公平山集  
盛傳於世如十二月鼓子詞爲王荆公所稱而  
未嘗進御東坡先生多卽席上口占歌詞如水  
調歌頭瓊樓玉宇之句聞於禁中僅取終是愛  
君之賞而已而未嘗大用若公際風雲之會履  
樞機之任調燮之暇游戲翰墨風動泉流而皆

上賡

帝歌下鳴雅頌與二三元老更倡迭和於廟堂  
之上比之歐蘇二公所遇過之矣今觀諸一編  
之中許國之志憂時之誠溢於言表雖倉卒寓  
興而莊重典雅婉麗清新颯颯乎雍熙太和之  
音也於乎休哉古之善詞者温庭筠韋莊馮延  
巳之流失之浮艷周美成柳耆卿康伯可之流  
失之淺近辛幼安劉改之陳同甫之流失之麤  
豪如公之作華而有則樂而不淫實詞林之宗  
匠也宜侍御君之賢拳拳刻之也乎雖然予竊



聞公每

召對

便殿進侍

行幄忠言嘉謨隨事規益終日疊疊深契

聖衷都俞吁咈之詳有非左右可得而傳而天下陰受其賜則多矣由此觀之公昔之寄我者皆其畧也而况於茲集也哉他日金匱石室之藏必有良史書之以媲美虞謨商訓於千載之上世之欲知公者尚當求其大可也

嘉靖戊戌冬十一月

資善大夫太子少保南京吏部尚書致仕前禮

部尚書兼翰林院學士專管

誥勅兼

國史副總裁長洲吳一鵬書



桂翁詞目錄

卷之一

法駕導引曲

首十三

水調歌頭

大江東去

感皇恩

二首

望江南

三首

減字木蘭花

萬年歡

浣溪沙

漢宮春

卷之二

水調歌頭

首十四

沁園春

八首

減字木蘭花

過秦樓



滿庭芳

賣花聲

如夢令

二首

長相思

十一首

大江東去

十二首

卷之三

菩薩蠻

二首

浣溪沙

三首

壽仙翁

二首

迎春樂

玉樓春

風入松

桂枝香

水龍吟

二首

賀聖朝影

碧空月詞

玉帶花

念奴嬌

二首

踏莎行

大江東去

五首

蝶戀花

減字木蘭花

喜遷鶯

綺羅香

沁園春

少年遊

二首

卷之四

水調歌頭

沁園春

九首

減字木蘭花

八首

木蘭花令

滿庭芳

大江東去

鳳凰臺上憶吹簫

鳳棲梧

瑞鶴仙



漁家傲

四首

菩薩蠻

二首

浣溪沙

六首

法曲獻仙音

憶舊遊

蝶戀花

越溪春

二首

錦堂春

千秋歲

二首

行香子

南山壽

萬年歡

二首

卷之五

沁園春

二首

減字木蘭花

七首

木蘭花令

二首

滿庭芳

二首

踏莎行

無俗念

大江東去

三首

漁家傲

二首

阮郎歸

二首

浣溪沙

四首

迎春樂

醜奴兒

四首

鶴冲天

二首

蘇幕遮

玉樓春

齊天樂

丹鳳吟

蝶戀花

菩薩蠻迴文

風入松

浪淘沙令

二首

訴衷情

滿江紅

二首

蘇武慢

臨江仙

二首

鷓鴣天



桂枝香

西江月 三首

摸魚兒

卜算子

水調歌頭

少年遊

卷之六

壽仙翁

酌江月 四首

漁家傲

永遇樂

沁園春 十一首

浣溪沙 七首

減字木蘭花

四首

臨江仙

大江東去

壺中天

法駕導引曲

西江月 二首

滿江紅

如夢令 四首

菩薩蠻 迴文

念奴嬌 三首

桂翁詞目錄終









桂翁詞卷之一

法駕導引曲 二首

紀  
上祀方澤

一

六龍駕六龍駕晚出鳳凰樓輦路無塵甘雨霽  
海波不動卿雲流 天子祀 方丘

二

方丘上方丘上午夜御香浮列宿光依龍袞靜  
明蟾影逐翠華流爽氣似高秋

三





朝泰折朝泰折玉輅自天臨五嶽百靈齊獻瑞  
川侯海伯盡輸琛 后土鑒 皇心

又 五首

辛丑春

上建保祥齋

仁壽宮中靈幡結瑞應制

一  
瑤壇上瑤壇上寶蓋綴華幡鳳尾交交彩霞舞  
龍鱗宛宛紫霓盤織女降雲端

二

寶幡結寶幡結神巧示天工錦帶盤盤雙舞鳳  
綵旒曲曲九蟠龍縹緲逐靈風

三

帝神降帝神降天樂下叢霄十絕霓幡蒼霧結  
九華羽蓋翠雲飄肅肅萬靈朝

四

鑪香蕤鑪香蕤秘禱九天靈結固玄珠封玉鼎  
保和金液注黃庭十月誕仙嬰

五

朝北極朝北極斗轉帝車迴歷歷珠星聯五緯  
高高華蓋護三台壽域萬年開

又 五首

辛丑夏

仁壽宮醮壇鶴降

應制



白鶴下白鶴下遙自九天來圓頂丹砂千歲火  
修脛紫甲萬年苔玉骨本仙胎

二

白鶴舞白鶴舞雲翮恣踟躕瑤水乍離王母畔  
霓裳先到玉皇前鳳苑集群仙

三

白鶴唳白鶴唳明月烟清霄響入高雲凝碧落  
吸來涼露滴松梢緱嶺玉笙遙

四

白鶴舉白鶴舉振翮駕天風周覽六虛升紫府  
直從三島涉玄空白日過崆峒

五

白鶴導白鶴導仙仗擁天衢翠羽翩翩九芝蓋  
霓旌渺渺五雲車遙下太清居

水調歌頭

奉

上旨詣文華殿代拜 先聖先師

雨霽蒼龍闕月明虎豹關虛閣遙聞清漏鳥宿  
禁林安左掖金鋪半啓西內鍾聲初動玉殿上  
香還草承瑤珮濕花暎鶴袍丹 正高城擊柝



罷小星殘身繞鳳凰池上歸步信安閒忝竊孤  
卿重任霑沐 聖師餘澤真愧草茅寒遭逢千  
載異 君德重於山

大江東去

扈 街覽 暉渡河日進呈

九曲黃河畢竟是天上人間何物西出崑崙東  
到海直走更無堅壁噴薄三門奔騰積石浪捲  
巴山雪長江萬里乾坤兩派雄傑 親隨 大  
駕南巡龍舟鳳舸白日中流發夾岸旌旗圍鐵  
騎照水甲光明滅俯視中原遙瞻岱嶽一縷青

如髮壯觀盛事已亥嘉靖三月

感皇恩 二首

送 欽賜書院諸扁出城

御榻降絲綸樓堂書院次第嘉名出 宸翰更  
令華扁製司空金碧雲龍光爛遣使送江南還  
乘傳 鼓吹喧闐冠裳擁塞夾道千人萬人看  
城東小駐日午離筵方散盛事記今朝蒙 天  
眷

又

恩賜 中秋日恭紀



今夕是中秋朝來中使宮醪玉饌傳宣至白燂  
羔羊玉雪如雙月餅黃金似更五尊秋露連翩  
賜小臣何幸蒙恩非次佳辰况復逢熙事  
皇女撾週寶玉盤中三試有一函御札親批  
示

望江南 二首 西苑除夕

歲云暮除夕是明朝襟被未離西苑直珮環方  
候紫宸朝秉燭醉宮醪  
禁中夜宮漏箭頻催玉劔雲寒祈雪罷霞衣露  
濕醮星回金殿紫壇開

減字木蘭花

壬寅正月六日奉

聖諭今日皇四女試歲周一取鐘二取銀三

取黃水晶石示卿等知

恭述此詞用紀嘉事

正元六日西苑五臣同 召入喜溢龍樓 皇  
女今朝試歲周詳看 御札三取盤中皆吉物  
去歲今辰彩段宮花拜賜新

萬年歡

西苑賀  
土禱雪有應

瑞滿長空見同雲密布瓊花飄雪壇上爐煙馥  
馥沉檀和屑風裏寶幡雙結膽縹緲霓旌素節



導引皓鶴千群遙下玉樓銀闕 銅龍漏咽正  
九關魚鑰沉沉夜光皎潔平曉迷漫迤邐瑤臺  
相接 聖主憂民念切對此際 龍顏開悅况  
正屬臘內春前一白勝於三白

浣溪沙 二首

壬寅正月十六日見  
東宮幣米過金海作

迎和門外日初晴玉樹瓊樓照眼明胡牀穩坐  
度層冰 此日人間占瑞雪昨宵天上看華燈  
朱衣凌曉禁中行  
高閣春雲護九重日華曉色映籠蔥新年今日

見 東宮 龍鳳姿容天日表聖神根器帝王  
風老臣歡喜萬方同

漢宮春

壬寅元夕  
上召觀燈 仁壽宮

醮罷星壇正華燈滿架寶炬盈盤高下彩霞搖  
曳珠斗爛斑黃金臺殿光掩映白玉雕欄有中  
使傳宣 丹詔賜臣特地來看 感激 皇恩  
浩蕩念幾人能得天上奇觀况是陽春降澤  
玉帝回鑾祥光瑞色護 九重寶月團團喜今  
年太平嘉慶良宵上奉 宸歡



桂翁詞卷之一終

國家圖書館, NATIONAL CENTRAL LIBRARY, TAIWAN, R.O.C.



桂翁詞卷之二

水調歌頭

十四首

答王浚川司馬

黃金明魏闕白日照燕關歲歲花香柳媚春色  
滿長安只恠鴛聲太巧底事燕巢無定昏暮馬  
蹄還爲渠雙鬢白添我寸心丹問蒼生多困  
苦甚凋殘獨使至尊憂切忍放一身間感歎  
明良相遇說到聖賢出處風雨對牀寒寄與浚  
川老莫學謝東山

又

答張甬川少宰

昔年薤水上終日掩柴關相伴碧峯猿鶴無復



夢長安幾見林花開謝坐數鷗群朝暮時共野  
雲還不愁生白髮那用覓金丹 到如今芳草  
遠桂枝殘只爲波濤浩蕩舟楫怎容閒誰作甘  
霖濟旱安得鹽梅調鸛廣廈庇酸寒但須垂竹  
帛底美勒燕山

又 答甬川言邊情

漢兵朝出塞胡馬夜臨關咫尺雲中烽火羽檄  
滿長安幸賴 君王神武報道天聲不殺黠虜  
望風還廟謨皆 帝力仁義炳如丹 是何心  
甘戰鬥恣貪殘忍使農耕荒却機杼盡拋閒堪

歎沿邊驍將可惜連營勁卒凍苦雪霜寒果誰  
驅鐵騎直擣賀蘭山

又 答甬川寫情

綠槐陰合匝黃鳥語間關簷外數竿修竹日午  
報平安朝退簿書多暇睡起吏人初散林暮鳥  
仍還興來時命酒何暇問燒丹 夜堂深涼雨  
後燭花殘點檢平生心事雲在意俱閒浪說朝  
陽鳴鳳漫道中流砥柱寶劍照霜寒總爲 君  
恩重當年別故山

又 題許司徒松臯書屋



平阜松十里紫氣接函關覆野虬枝如蓋上有  
鶴巢安落日嵩雲片片秋水洛川渺渺林黑雨  
龍還昔聞廣成子曾此煉神丹 慨經罹秦火  
後六經殘我愛兩程夫子守道樂安閒一自神  
龜呈瑞天啓中原文物奎壁夜芒寒白髮司農  
老築室占青山

又 東甬川少宰感舊

雋才名翰苑雅望重賢關照眼玉壺氷鑑性度  
自安安曾向湖南問訊咫尺龍門迢遞萬里使  
車還尋仙遊五嶽分我玉杵丹 望鍾陵春草

碧杏花殘幾度寄書無鴈彩筆畫堂閒追憶舟  
檣北上張望林丘高臥祗恐舊盟寒那知開口  
笑今日共蓬山

又 答甬川納涼之作

微颺生竹院涼月照松關避暑南宮仙署藤枕  
石牀安望切瓊樓玉宇思入雪山氷壑八極馭  
風還雨添荷葉碧露洗海榴丹 坐來深香燼  
冷漏聲殘靜看銀河清淺天闊水容閒想像水  
晶簾箔恍惚琉璃宮闕瀟灑玉壺寒更欲騎黃  
鶴吹笙近碧山



又送西樵閣老

朝回望行蓋離思遶江關正喜雲龍相聚公去  
豈心安莫學堯夫康濟且辦杜陵藥餌聊送馬  
卿還底須訪仙竈自有活人丹 問年齡纔五  
十未衰殘况有 九重眷注能便早投閒從古  
聖君難遇海內蒼生無數猶未免饑寒相看臨  
潞水有夢到樵山

又東浚川論詩

清霜飛畫棟栢府晝長關炯炯臺端孤月林靜  
夜烏安我愛漢庭老吏本是玉堂詞客江海召

初還冠我金豸角袍繡鶴頭丹 酒杯深簷花  
細劍歌殘幾度笑談今古坐久藉餘閒總是杜  
陵高格只有謫仙豪興郊島太癯寒知音誰大  
雅文藻落江山

又答黃致齋論學

太極原無象夢覺亦非關天性渾然心地定靜  
自能安只爲一團私欲便有許多馳逐長往不  
知還洪鑪難著雪點鐵要須丹 歎言湮嗟教  
弛慨經殘可恠支離末學棄實尚虛間須辨小  
人君子方識霸圖王道水火異炎寒斯文天未



喪萬古仰尼山

又 雨霽東甬川

鳴雨歇深院高門閉重關虛室涼生枕簟晝寢  
夢魂安天外好風時至林際斷霞孤暎鴉帶夕  
陽還庭交莎草綠砌擁蜀葵丹 暑氣銷暝陰  
歛角聲殘起步簷楹徙倚聊得簿書閒却憶年  
時故里曾喚小舟載酒草閣枕江寒月明歌綠  
水雲淨看青山

又 談玄東浚川

我有先天氣日日透三關走上崑崙絕頂奔入

絳宮安飛灑鵲橋甘露凝結玄珠黍米八九互  
迴還風雷起中夜龍虎護初丹 又何妨鉛汞  
老藥苗殘靜裏調停心息呼吸自間間出入原  
通橐籥烹煉不須鑪竈水熱火偏寒興來遊八  
極醉裏度三山

又 談禪東顧未齋

飛錫還歸定蒲團且閉關借問九年面壁四大  
怎生安都落黑風鬼國那是慈航彼岸誰手買  
珠還我佛原無法衆生自有丹 一棒打千相  
滅萬燈殘纔被風幡勘破寂寂鏡臺閒水上蓮



花穩坐蘆葉江心徑渡圓影浸波寒離諸煩惱  
障爾是清涼山

又

答霍渭厓論學

漫頂伊川帽徒扣紫陽關不見宮墻數仞何處  
把身安著眼路岐差錯舉步草茅梗塞古道竟  
難還原無鑽孔鐵空慕點顏丹 大音微玄酒  
濁太羹殘只爲多添註脚翻使六經間信口談  
何容易下手便成顛倒都不療饑寒蹄涔訖滄  
海蟻垤笑丘山

沁園春

送蔡都御史半洲巡撫山東

瑣闥英僚杏園仙侶廿載交承念霄漢飛騰冠  
裳爭美風波獨立夢寐堪驚 聖主憐才老天  
畱我玉帶今朝送子行離亭酒也須拚盡醉莫  
惜深傾 丈夫有志功名願白首丹心答 聖  
明喜節鉞東征遠山雲淨樓船南下新水河平  
問訊閭閻觀風闕里白日青天岱嶽橫望中原  
好徐徐攬轡早見澄清

又

擬送王司馬北征

紫殿宣麻彤墀錫宴仗鉞專征看白日辭天玄  
冬出塞金戈寒映寶劒雄鳴雪滿居庸山橫碣



石北去龍沙幾日程據鞍處正旌旗蔽野鼓角連營  
丈夫有志功名好戡亂扶危定太平况  
聖主恩深清時望重試憑全策早下堅城王濬  
平吳裴公破蔡勲業真堪帶礪盟登壇處願指  
麾諸將一戰功成

又贈張亞卿東瀛督餉宣大

諫闥封章司農會計久著賢聲憶奉使西川賑  
荒全陝風裁霜厲節操永清朝論同歸 帝心  
簡在督餉雲中壯此行指揮處看三軍嬉飽萬  
馬騰鳴 天寒紫塞龍城正坐擁貔貅百萬兵

念虎帳風嚴轅門月冷敵聲夜撼殺氣朝橫諸  
葛神機鄼侯英略芻粟如山轉運平策勲日定  
功同汗馬麟閣書名

又送林小泉司空致仕

屢疏求閒 殊恩優老晝繡還鄉看曉日都門  
秋雲錦席樓船未發冠蓋相望白首烏紗緋袍  
玉帶却笑神仙是渺茫歸途好覽樓臺北固簾  
鼓錢塘 君家慶澤深長喜金榜相傳四世芳  
况春省賢郎玉堂少弟聲名並起事業方張烏石  
巖頭金鰲谷口此地宜開綠野堂高齋臥有三



竿紅日一曲滄浪

又 送毛東塘司馬經畧安南

樞府尚書儲宮賓客文武全才正海國秋風樓  
船遙下沙場春日斧鉞初回鳳闕頌恩龍墀錫  
宴馬首旌旗萬里開天聲震看指麾雲鳥號令  
風雷 炎荒朔雪周迴總只爲天王闢草萊想  
定遠封侯玉關迢遞伏波爲將銅柱崔嵬百國  
銷兵諸蠻納土千羽從容列兩階歸來日早圖  
形麟閣晉位三台

又 賀介谿大宗伯壽六十

春月纔圓春花欲放春宴初開喜春省仙卿高  
躋眉壽春曹諸彥共賦臺萊留賞春燈醉酣春  
酒一任春宵鼓角催春堂上藹十分春色光映  
三台 主人昔占春魁有贊治春官禮樂才况  
雅量春融清顏春盎化行春雨名震春雷春殿  
宣麻春宮定策春日還看拜玉階春風裏好調  
和玉燭照耀春臺

又 寄贈石門閣老行邊

紫閣元公玉堂詞伯仗節行邊計策馬雲中關  
山春日迴車遼左海戍秋烟嘉峪關前賀蘭山



下幾夜星營鼓角喧臨戎處喜宮袍座擁 賜  
帶腰懸 憐公將相雙權算文武材猷世罕全  
况司馬壯遊馳驅萬里韓公雄畧功業千年  
當宁虛懷故人遠念幾見軍中羽檄傳早歸來  
共高歌雪曲酒醒朝 天

又

賀大司徒蒲汀李公六十

白玉橋東碧山樓畔晝錦堂開正冠蓋盈門笙  
歌滿座紅蓮纔放綠酒初醅紫禁朝回鳳池吏  
散特爲先生慶壽來獻新詞嗣音大雅敬祝臺  
萊 共看廊廟竒才更星斗文章逼上台况海

嶽精神壯騰龍馬雲霄氣槩時動風雷 聖王  
思賢明時求舊旦日徵書下玉階願從頭把經  
綸再試花甲重排

減字木蘭花

嘲未齋六十生兒

玉堂詞伯六十風流頭未白前月生兒子婦成  
行獻壽卮 東鄰有客海上蟠桃猶未結可恠  
黃金偏贈豪家不贈貧

過秦樓

寄秦嶼湖都憲

徐孺亭邊滕王閣畔舊識中丞開府燕雀春間  
魚龍夜靜白晝滿城簫鼓時看節鉞臨戎宮墻



校士笑談樽俎有邦人報道十郡兵銷九江渡  
虎望故園寶澤樓成瓊恩堂啓輪奐暈飛百  
堵仰荷皇恩欽承帝勅經畫有煩地主廬  
阜風煙靈峯雲氣壯觀大江今古念非才遭際  
商家豈堪霖雨

滿庭芳

賞盆荷次李蒲汀韻

寶墨樓前賜麟堂畔盆荷初放仙葩翠盤擎玉  
紅艷奪朝霞的的明妝映水迎風處旖旎堪誇  
午睡醒湘簾半捲清馥透窓紗玉堂秋夢好  
謝池吟草淹筆生花把新詞寫就緘寄東家我

愛紅衣漸褪碧房內玉子交加更階前槐黃桂  
綠次第到蘭芽

賣花聲

次王浚川韻

絳蠓恣高燒別院春宵玉顏花面不勝嬌可惜  
鳳凰臺上月獨自吹簫夢斷綵雲朝巫峽迢  
遙江南暮雨正瀟瀟湘水不回芳草歇千里  
銷

如夢令

和浚川韻

草長池塘春雨日出鳩鳴桑樹背郭草堂寬此  
是山人家處閒緒閒緒愛與白雲爲主



又

樓外綠楊嫋嫋樓上有人間  
眺細雨燕初飛水滿綠池蛙鬧  
報道報道又是一年春好

長相思 和浚川韻

思悠悠夢悠悠多夢多思併入秋  
相看人白頭

蘋花洲蓼花洲紅蓼白蘋生遠愁  
憑高獨上

樓

又

岸悠悠水悠悠楓葉蘆花瑟瑟秋  
孤帆天際頭

白鷺洲鸚鵡洲一帶澄江銷客愁  
醉登黃鶴

樓

又

黃鸝啼曉夢疑迢迢江南人未歸  
春秋雙鬢知

鴈南飛鄉思遲長憶江村細雨時  
閒看鷗鷺

磯

又

荼蘼香薔薇香庭院微風白晝長  
人間春草芳

望瀟湘隔瀟湘天遠樓臺人一方  
相思紫寸

腸

又

三百十

佳句同卷三

二

呂元偉



曉盈盈玉池萍老鶴松梢警露鳴石壇花氣清  
泉泠泠遶磴聲山鳥相呼如引朋道人幽興  
生

又

風蕭蕭雨蕭蕭獨坐虛堂夜寂寥詩成絳蠟銷  
山迢迢水迢迢回首江南歸夢遙頻將短鬢  
搔

又

疊舊韻寄答顧東橋

天悠悠水悠悠天水相連萬里秋佳人楚水頭  
憶滄洲隔滄洲渺渺烟波生暮愁那堪獨倚

樓

又

山悠悠水悠悠水遠山長湘渚秋衡陽天際頭  
風滿洲雨滿洲細雨斜風生野愁休登江上  
樓

又

杜鵑啼君莫疑日日思歸未得歸鄉心有夢知  
鴻鴈飛音信遲又是黃花白露時西風吹釣

磯

又



水盈盈一池萍曉雨初收林鳥鳴園亭秋意深  
風泠泠戛竹聲獨鶴孤雲爲友朋道心隨處  
生

又

情悠悠事悠悠往事多情不耐秋無端白了頭  
花滿洲草滿洲草暗花明總是愁  
嚼孟懶下樓

大江東去

和東坡韻答陸儼翁

鳳閣鸞臺受綵綸重寄敢忘民物欲挽江河無  
氣力空美巖巖立壁邊塞煙塵閭閻疾苦贏得

頭顱雪憑誰整頓濟時全仗才傑 天生 聖  
主中興聰明神武號令風雷發赤日扶桑騰照  
耀多少燭沉燐滅補袞何功調羹非手勳業無  
毫髮太平有象不妨吟弄風月

又答儼翁

昔試南宮荷明公收作藥籠中物彩筆玉堂千  
氣象瞻望文昌奎壁席上春風尊前夜雨幾對  
程門雪飛英振藻一時真愧諸傑 獨憐萬里  
馳驅三江六詔使節連翩發瑣闥十年曾抗疏  
舊草萬行明滅霄漢飛騰風波震駭白盡巾中



髮長安今夕芳樽且醉華月

又 答李蒲汀餽水晶葡萄

病渴相如喜故人遺此盤中珍物却想碧山樓  
閣下雙檜幽亭西壁滿架明珠一林蒼玉六月  
涵冰雪移來絕域張騫也是人傑 水晶顆顆  
勻圓纔教入口兩腋清風發洗我胸中千磊砢  
萬火一時俱滅便欲騎鯨乘風直上手挽驪龍  
髮廣寒宮裏冷然撥出秋月

又 再咏葡萄

一種靈株細摩挲不似人間之物偃蹇虬枝連

密葉風雨暗生墻壁的的懸珠纍纍如貫顆顆  
凝霜雪交梨火棗品題未許稱傑 絕憐白玉  
盤行黃金籠貯瑤席清輝發涼沁詩脾甘露爽  
坐使襟塵消滅玉女盆頭仙人掌上直欲披玄  
髮夜深滄海驪龍吐出明月

又 答蒲汀惠蟹

夜雨秋尊烹新蟹又見一年風物秉燭西堂聊  
自酌時聽蛩吟四壁滿殼膏肥雙鉗肉嫩味勝  
經霜雪遍嘗海錯還輸此種爲傑 芳鮮充溢  
雕盤真堪咀嚼清興翛然發却笑持螯人去後



風韻到今難滅更待黃橙也須紫菊取醉娛華  
髮中秋在望小樓約共看月

又 答陸儼翁渡河作

大河南北數千里一望中原民物迤邐江山開  
錦障盡是名城堅壁楚漢紛爭曹吳割據戰甲  
明霜雪一時閒氣筭來有甚豪傑 青春三月  
南征柳色連天滿路花爭發醉後彩毫吟麗句  
不管古今興滅 聖主中興太平有道德澤沾  
窮髮何年滄海釣竿時弄烟月

又 答李蒲汀張陽峯渡河作

源分天上算黃河不是人間之物橫亘中原三  
萬里失却烏江赤壁雷雨掀騰魚龍變化桃浪  
翻紅雪乾坤流峙泰山堪與爭傑 昔年奉使  
遐方馬首東風見洛陽花發諸將提兵淮海上  
群盜未曾驅滅關塞崎嶇風塵瀕洞夢寐驚毛  
髮太平今日重來又值春月

又 答未齋閣老渡河作

大河東下走萬里包納許多靈物推盪中原無  
砥柱那問全城半壁靜影涵空洪波浴日巨浪  
翻銀雪蛟鼉出沒神龍羞與爭傑 曾誰醉臥



三山飛游八極獨駕天風發畢竟此河經萬古  
看盡人間生滅老子曾中乂吞雲夢烏帽今華  
髮圓通朗照心如天上明月

又庚子初度陸儼翁作金焦圖和東坡  
此詞遠其子禪瞿壻學召來爲予壽  
予喜對二子  
即席賦答

一撮峯兒障長江真是天生神物海國江門濤  
陣湧玉壘雄開兩壁孤拄乾坤雙擎日月萬古  
頭如雪地靈江左從來幾箇人傑 玉堂天上  
仙翁畫裏新詞彩筆雲煙發品隲人才高與下  
勘破世間興滅二十年前門生座主不覺俱華

髮丹心炳炳敢負中興歲月

又二首 庚子初度石門少傅松皋太  
宰介谿宗伯治具來賀即席和答

瑞鶴靈龜雙白鹿誰獻壽筵珍物一簇笙歌圍  
錦障雜還東廂西壁黃閣元公春卿太宰玉質  
涵冰雪周廷朋壽不數漢家三傑 麟袍蟒繡  
輝煌玉帶聯翩高興尊前發銀箭不聞更漏永  
紅燭千行明滅却咲吾生今朝初度鬢有星星  
髮年年同醉管領壺中日月

二

大藥難求看人間那有長生之物滄海桑田經




幾變說甚烏江赤壁麟閣圖形燕然勒蹟博得  
頭如雪古今代謝幾多賢聖豪傑 小子今日  
生辰醉後狂歌聊爲諸公發富貴功名都是夢  
只有芳名不滅男子頭顱丈夫意氣要有衝冠  
髮寸心耿耿冰壺沁秋月


又 題宗伯張陽峯仰宸樓

百尺危樓面陽峯覽盡楚天雲物西望武昌東  
夏口遙對黃州赤壁清簾踈簾投壺散帙炎夏  
生冰雪玉堂雄構未許元龍稱傑 讀書夜感  
青藜畫棟雕簷星斗寒光發秋水長空涵鴈影  
時見斷霞明滅學士當年倚欄凝睇把鏡悲華  
髮丹心歲晚尺咫身依日月





國家圖書館, NATIONAL CENTRAL LIBRARY, TAIWAN, R.O.C.





桂翁詞卷之三

菩薩蠻

送呂涇野之南都

借問誰爲有道者我識關中呂涇野何必羨魁  
倫當知第一人文章由道義談笑含經濟且  
醉石頭城大江門外橫

又

從前歲月如流水一生紫闥彤闈裏暮暮復朝  
朝玉階金水橋青天眉月偃左掖歸來晚夜  
夜故園情夢回聞漏聲

浣溪沙

答序翁惠蟹



瀛海波涵秋氣清白沙如雪夜盈盈月明紫蟹  
陣橫行春甕酒初浮綠蟻小園景已到香橙  
百枚遣贈謝高情

又暮入詹事府訪崔後渠學士

記得當時過鄴城後渠亭上漫題名萬竿修竹  
遶簷楹一字不曾通政府十年始得見先生  
玉堂相對有餘情

又

玉署春坊樹影重御溝流水岸西東也須着箇  
後渠翁風細層軒修竹裏雨涼深院綠槐中

黃昏來訪語匆匆

壽仙翁賀序翁誕辰

鶯黃染柳海棠紅透恰纔過禁煙時候雲擁沙  
堤見輪蹄馳驟來祝相公眉壽薇圃新移花  
鳥正宜春晝日日把笙歌送酒玉帶麟袍勲業  
三朝舊此福人間希有

又

今朝春酒爲公祝壽猶道是相逢淮右紫閣黃  
扉忝竊夔龍後青鬢而今難又屈指軋坤幾  
箇太平耆舊且一任丹心白首願把忠貞報答



明明后千載一時那有

迎春樂 人日閣中對序翁小酌

人日今年風日好彤雲覆龍樓曉望春旗影逐  
東風裊鳴玉珮瞻天表 黃扉紫閣層城遠擁  
宮袍玉尊傾倒此地是神仙更何處尋蓬島

玉樓春

己亥秋日賀未齋閣  
老新作麟袍之照

霖雨堂城增氣象麟袍 勅賜來天上共羨龍  
頭老狀元雅稱鳳池真宰相 鶴班着處人瞻  
仰衣被新恩誇浩蕩更看高閣畫儀形要使  
生諧屬望

風入松 答儼翁

綠牕午枕睡初酣夢喜脫朝簪覺來猶是長安  
客垂楊裏空繫歸驂戀 主身依曉闕思親淚  
灑春衫 玉河流水碧於藍花外燕呢喃新詞  
一曲憑誰和泥封罷親手題絨試待天邊鴻鴈  
秋風寄與江南

桂枝香

送費鍾石少宰之  
南都次荆公韻

長空極目見幾度冥鴻南飛肅肅劇想鍾陵山  
色烟霞如簇石頭城外長江水趁西風亂帆遙  
揚柳秦淮蒹葭鷺渚舊游未足 念十載紅



馳逐歎松菊幽盟易寒難續白髮盈巾總爲  
是非榮辱桂樹洲邊蕪水畔但芳草年年增綠  
何時携手歸釣水溪一曲

水龍吟

次去秋軒韻賀未  
嘗驚也老霖雨堂次

文章獨占龍頭當年已識絲綸手身歷三朝  
官登極品當今耆舊晚入黃扉平生青眼相看  
白首喜長安霖雨堂成道神仙宰相人知否  
甲第高連北斗又何必錦袍明畫畫寢凝香朱  
門列戟紫衣奔走燈火樓臺笙歌院落年年春  
酒庇蒼生更作萬間廣廈爲相公壽

又

夜宴未齋宅賞座  
上牡丹再次前韻

名花坐對嫣然玉杯滿泛休停手相府風光  
帝城春色可人依舊真是天香堪稱國色群芳  
魁首喜夜深銀燭高燒問紅粧艷質曾如否  
簷外漸移星斗况今夕月明如畫雀錦屏開麟  
袍座列朱衣庭走占斷人間梨園法曲黃封御  
酒願年年共賞霖雨堂中放歌爲壽

賀聖朝影

東李蒲汀約  
飲碧山樓

東鄰學士正青春脫風塵碧山終日坐朝昏足  
閒身 秋風吹散西山雨月華新葡萄架底醉



醺醺共何人

碧空月詞壽周泉坡  
司寇六十

漢庭真老吏中臺舊豸冠威儀風節重朝端自  
是廟堂器宇足人看鬢帶星星白曾藏炳炳  
丹六旬壽酒醉長安正值碧空霜月淨團團

玉帶花寄南京楊  
四泉光祿

昔日少年今漸老追憶舊遊而今難得朱雀橋  
邊烏衣巷口前朝舊宅秦淮畔走馬聽鶯幾醉  
笙歌月二十七年渾似夢塵土風波儘曾經  
歷畫省黃扉但碌碌無庸枉教頭白江左故人

時寄我錦箋盈尺却憐幾箇同心又隔天南北

念奴嬌次山谷韻人日答李蒲汀

東風忽到問天涯芳草漸生新綠白髮又添人  
一歲何日向平願足晏下彤闈明登紫閣謾衣  
朱腰玉何如畫舫春江滿載醺醪帝城迤邐  
風光寶樓西畔淡月籠高木點檢燈前十年事  
此夜一杯誰屬入歲占雲經冬望雪倚遍危欄  
曲朝陽彩鳳幾時飛上庭竹

又答蒲汀冬日之作

朔風一夜攪霜空丹却千林寒綠簾捲碧山樓



閣靜鎮日看山未足我美高人蕭然林洞鶴骨  
清如玉園收芋栗擁爐時瀉醅醖嚴冬物色  
荒涼欹枕蕭蕭落盡燕山木長憶東鄰間學士  
那得一尊相屬病起揮毫朝回隱几漫寫江南  
曲柴門溪上猶鎖萬竿修竹

踏莎行

答李蒲汀賀  
賜騎馬禁中

太素原頭廣寒山後平沙堤畔雕鞍驟宮監傳  
宣下御墀奚官控引來天廐玉帶螭盤緋袍  
鱗繡封章日對天顏奏君臣相遇古來難唐

虞千載今方又

大江東去

次東坡韻答蒲汀送蟹

秋意滿前正銜杯又見江鄉風物同巷高人應  
念我伏枕蕭條四壁許大憂懷無邊歸思撚斷  
髭鬚雪自憐迂叟豈堪相伴朝傑去歲今辰  
想尊羹鱸膾高興徒發幾度長空南望盡鴈字  
千行明滅攬鏡堪悲壯顏非舊禿盡衝冠髮危  
樓昨夜坐到西巖墮月

又

答蒲汀惠水晶葡萄

小坐秋軒謝蒲翁遣贈名園佳物自啓筠籠喚



纖手携置麟堂東壁碧水含晶繁星煥彩寒映  
冰盤雪如珠似玉果中應是魁傑 總憶年時  
咏葡萄一體新詞三發幾對黃花烹紫蟹又悟  
世間生滅漢閣丹青商山杖屨畢竟俱華髮清  
尊架底且醉藤蘿夜月

又

再疊前韻答蒲汀蟹詞

水落蒹葭白露冷長養橫行之物夜雨踈燈照  
蝸涎曉起枯黏滿壁物色堪嗟人情可慨秋鬢  
添新雪飄然霞外神仙真是豪傑 故園酒熟  
鷄肥相對青山有約黃花發但得天恩容拂袖

眼底風波自滅寵辱閒驚是非妄惱曾次無毫  
髮寸心皎皎爭光天上秋月

右二詞壬寅六月二十日作此時待

罪閉門有憂讒懷隱之踪焉

又

再答蒲汀水晶葡萄之咏

水晶宮裏撒明珠散作園林珍物恍若老龍行  
雨罷倦臥藤軒西壁影亂潭星光分海月清映  
瑤峯雪碧山樓下主人真是人傑 摘來玉乳  
纍纍把贈題絨每爲比鄰發况復年年勞賦咏  
滿紙墨華明滅丘壑情深江湖憂在相對驚鬢

三六

沈喬

一

沈喬



髮如公經濟未許平章風月

又和答張揚奉宗伯寄賀在丑初度之作

衡嶽湘川產名公真是玉堂人物紫禁彤庭携  
手舊何日同遊赤壁鏡裏朱顏花前青鬢又早  
巾中雪非才宜退匡時賴有英傑自從身入  
黃扉仰慚白日歸興時時發彩筆新詞勞遠寄  
滿紙雲煙明滅花甲初週世途飽歷長吟空搔  
髮鍾陵南望故人千里明月

蝶戀花

次李蒲汀秋日之作

高樓半餉看雲睡枕簟涼生不覺西風至屈指

明年六十二巾中白髮先秋墜造物小兒真  
劇戲反覆無端堪笑人間事履險從來吾有備  
安身只是心無累

減字木蘭花

贈少司馬費鍾石考滿

侍郎六載南北分衙半江海

先任南京吏禮二部

晚向兵

曹暫輟三長試六韜兼資文武自古人才堪  
指數莫厭官遲千載明良此一時

喜遷鶯

送汪東峯中丞巡撫江西

冠義豸角暫坐輟中臺行臨方岳虹井煙霞東  
峯花鳥江海十年離索青瑣先朝交契白首



此時歡謔對尊酒正櫪馬初喧驪歌又作拋  
却念今日處處民窮不見閭閻樂洗滌創痍  
回醇俗須仗大賢經畧鐵柱浮淵舊夢畫棟飛  
雲高閣大江畔恐節鉞難淹廟堂有約

綺羅香

賀答蒲汀賞盆荷

雨過盆池風吹荷葉絕勝銀塘幽意幾朶仙葩  
綽約楊家姊妹鬪紅妝映水朱妍洗素容凌波  
玉膩小亭中琥珀杯濃相看不覺同花醉却  
羨東鄰老子散髮碧山樓頓添芳思自譜新詞  
一曲與花爭媚恐西風容易驚秋對南薰吟歌

休棄况光陰暮景如馳只索牢牽轡

沁園春

辛丑十一月一日西苑紀興東  
翟石門嚴介谿成國公京山侯

公四

仁壽宮前幽風亭畔帝社壇東正晴日高天  
煙銷霧斂遠山秋水擁翠涵空玉帶金貂麟袍  
繡蟒只尺丹青扈六龍鎮日裏珍羞絡繹  
天語從容底須駕鶴崆峒又何必尋仙海上  
峯念際會風雲身都將相一時文武總是英雄  
媿我迂踈豈堪疇伍自分長辭紫閣中却誰料  
今朝一咲還共諸公



少年遊

二首

壬寅端午柬李蕭汀

蒲汎金觴黍包玉粒節序又端陽  
草閣臨流龍舟競渡幾度夢江鄉  
却笑衰翁長臥病猶自戀朝行  
經國無能君思未許終日費思量

又

多謝山翁園收瓜豆餽我過端陽  
飯煮香稬酒斟浮蟻風物似吾鄉  
無奈感時添客慮欲語向誰行  
入閣平明揮毫盡日心口自思量

桂翁詞卷之三終



桂翁詞卷之四

水調歌頭

贈俞舜臣憲副赴南贛

戲彩南衙日籜燈北郭年回首富春山色幾度  
夢依然記得長安走馬携手瓊林歸醉又隔廿  
年前却慚黃閣老相對栢臺賢念交承論往  
昔重驚憐莫憚驅馳波嶺豸繡映青天久識外  
臺風采行覩中丞節鉞開府大江邊甘霖滋大  
旱巨楫濟長川

沁園春

畱題費漸齋清湖新居

問訊溪山好秋風裏何處登臨愛清湖新築天



然融結眼中佳勝不讓橫林樓起青雲堂連綠  
野籬巷斜通碧樹陰最難得重湖沙繞隔嶺潭  
深 門前幾箇青岑台每日開窗對酒吟況隱  
隱花原從人借問蕭蕭竹逕許客相尋我勸先  
生多栽楊柳遍插芙蓉夾水潯更須買青娥畫  
舫莫吝黃金

又 送內弟詹望南還

二十年前恍然如昨初過君家愛門對青山橋  
橫綠水一川喬木數里煙霞白髮而翁紅顏阿  
姊予亦青矜鬢似鴉到而今追尋往事何限堪

嗟 京塵荏苒年華但明發趨朝暮放衙謾玉  
帶麟袍彤闈紫閣門施長戟路擁新沙桑梓關  
心風波激目安得山巔與水涯揮彩毫寫新詞  
一曲相送歸槎

又 二首 鉛山港口別方思道

千里故人一尊江上笑口同開念毛塢新巢夢  
竟空到麓堂舊約舟楫仍迴驄馬南行彤扉北  
望戀闕心懸碧水隈清宵立見中天奎壁光動  
三台 如公海內名魁有七步風流八斗才况  
此日詞林真堪妙選他年麟閣預卜先階沙燕



畱人潭花送客把手高歌一快哉蒼生望好大  
施霖雨遍沃蒿萊

又

春日相逢春山如畫不共登臨想象麓新堂棠  
花舊館池生碧草鶯語空林剪燭蓬窓振衣野  
岸中夜徘徊碧樹陰忘情處任朱絃調古綠酒  
杯深何須萬壑千岑記明月孤帆此夜吟念  
行李蕭蕭驅馳北上仙槎汎汎迢迢南尋報  
主關情憂時改鬢漫結心盟碧水潯百年裏看  
雙龍寶劍不負千金

又

送仰峯劉侍御赴福建僉憲

白日青天繡衣驄馬歸自錢塘正快觀中臺法  
星明潤忽看南徼憲節廻翔碧海三山武夷九  
曲迢迤風煙接故鄉憐君處仙帆秋水那得相  
將嗟予素食朝堂畏滿目波濤日夜狂念相  
業無成鬢毛先老君恩未報身世都忘按轡  
觀風停車問俗好爲閭閻作主張秋空裏尚遠  
瞻鵬鷲橫擊豺狼

又

送吳山泉赴山東憲副

寶帶垂金鐵冠裁豸玉節東行正木落關山霜



清海岱送君尊酒無限離情燈火東泉風雲北  
闕青鬢相看白髮生向天涯念同袍有幾又隔  
春明 人間青史功名難得是明良共太平計  
老我此身當年許國受知 聖主敢愛餘齡一  
道風霜萬家霖雨洗耳閭閻起頌聲思君處望  
樓臺屢結鵬鴉秋橫

又 送李龍洲侍御巡按江西

兩岸垂楊一灣芳草深護龍洲想夜雨當年主  
人雲臥雷門春水忽占鰲頭白簡凝霜鐵冠  
豸豸十載登朝侍 冕旒人爭避美行行驄馬按

部洪州 大江章貢交流有捲雨飛雲帝子樓  
看霜雪威稜豺狼遁野雲霄風力雕鷲橫秋白  
首懷鄉丹心戀 闕客夢時時到舊丘煩君去  
把窮簷民瘼仔細咨諏

又 送葉本仁作教合肥

道院寒燈儒宮夜榻猶記髫年念京第相逢堪  
驚歲月都亭分手又隔風煙烏帽新籠白袍初  
換莫厭青青座上氈廬江畔有門墻可愛桃李  
爭妍 看君潘鬢依然美腹笥藏經不讓邊嘆  
少日雲霄霜蹄躡躡躡暮年江海雲翮躡躡老我



非才際時何幸多病偏蒙 聖主憐鳳池裏正  
遲廻戀 闕惆悵歸田

又 送歐懋直憲副之任浙江

節操冰清丰標玉立名重司空正江左分曹纔  
歸省署浙西持憲更理兵戎約束諸軍按行五  
郡秋水樓船七里瀧最喜是鄉關入望民俗相  
通 富春山色龍從念昭德新祠夢寐中但有  
疏辭 天 君恩未許無由縮地仙舫難從酒  
醒長安夢回海嶠目送雲鴻萬里風歸朝早雙  
龍闕下一咲還同

減字木蘭花

送陶鏡峯侍御按滇南

行行且止驄馬人看真御史勁翮凌空一鷲秋  
橫萬里風 昆明池上春日旌旗同大將太華  
峯頭醉後曾將翰墨畱

又 二首 柬費民悅

玄寧觀裏月戶雲窻終日閉幾度相望白玉河  
橋一水長 病餘獨坐自譜新詞還自和懷抱  
誰開薄暮須君策馬來

又

詞鋒朗健月川信是吾宗彦博雅清修君是方



今第一流 文章論議有意求名終小技此道  
難傳不是英雄不聖賢

又 送林州同利升小泉之第

郎君好去扁舟一帶平川路直到灣頭過却楊  
州是泰州 泉山公後兄弟青雲七八九長見  
司空道爾高才有父風

又 寄胡浦南方伯

大江西望紫薇樓在星辰上方伯才雄知是雲  
間陸士龍 山明水麗寶閣瓊堂新 賜第鄉  
國歸心何日遙攀棨戟臨

又 送楊郎中克實謫官

翩然飛去黃鵠自有冲霄志具錦何妨人識天  
孫雲錦章 世情非古廊廟江湖心共苦憑仗  
忠貞要使蒼生見太平

又 贈楊正郎儀陞霸州兵備副使

勸君且去霸州豈是君居處可惜文儒却使提  
兵盜賊區 人情風雨不合當年曾薦汝聞說  
辭官休負平生一寸丹

又 送林員外應亮

文淵閣裏制草才雄長羨子少谷堂東出語曾



驚四座中 南宮吏隱白日還鄉誇畫錦北闕  
儒英合把文章答 聖明

木蘭花令

嘉靖戊戌京邸東堂新成與  
費即民悅吳郡以容唐四時  
臣二弟  
夜酌

東堂四月蕭蕭雨熟盡黃梅金滿樹長安今夕  
酒闌時故國他年夢回處 肉骨一家相對語  
試把前修屈指數事業還須努力成光陰莫遣  
虛拋去

滿庭芳

賀尹恒溪太守擢本省叅政

冰玉溪山煙霞城郭白雲曉簇黃堂皇華亭畔

綠水帶浮梁共道賢明太守真國器風節文章  
下車來桑麻遍野絃誦滿江鄉 古人誰得似  
龔爲渤海堪在漁陽覽從前青史何負循良一  
郡難淹驥足冲霄漢自屬鸞凰遙瞻望紫薇樓  
下添得箇仙郎

大江東去

贈謝少溪侍御按江西

鐵豸峩冠真御史不負清朝人物標格冰壺涵  
玉樹文采上騰奎壁聽馬巡行動搖山岳長夏  
飛霜雪大江西望山川偏稱英傑 獨憐檠戟  
遙臨明年秋日桂窟天香發坐使英才都入轂



列郡氛塵銷滅老我非才媿調商彝漫握周公  
髮玉堂杯酒送君相對明月

鳳凰臺上憶吹簫

送江陰高少參拜穆

天末涼風蒹葭秋水歸人獨上蘭舟正長空雨  
霽殘暑全收遙想澄江如練碧山堂水竹深幽  
堪乘興觀瀾小閣曲枕書樓 難留冥鴻天遠  
厭長安塵土不似滄洲有大觀亭子海濶雲浮  
惟念故人千里同明月相望夷猶知音少如公  
有幾大雅風流

鳳棲梧

壽母舅直齋先生

七十高年古稀有白髮烏紗林下安間久黃閣  
老甥來上壽一尊 勅賜長春酒 屋角西山  
青雨後初度華筵雅稱新秋候南極一星朝北  
斗朱顏千歲仍依舊

瑞鶴仙

壽序菴廼岳東峯何翁八十

正高秋極目愛東峯曉日芙蓉矗矗萬疊煙霞  
簇指仙翁家住洞天巖谷童顏鶴骨恣瀟灑茂  
林修竹更間來掃石焚香一炷彈琴數曲 佳  
辰纔過中秋月輪猶照金尊華屋向平願足那  
羨紆朱腰玉喜婆娑過了八十年光見盡是非



榮辱願從今難老占却人間五福

漁家飲

題童指揮松灣別墅

松灣一曲千峯抱葛陽溪上多芳草茅屋松陰  
深窈窕無人到松花落盡何曾掃我愛長松  
棲白鳥青山何日歸來早一枕松風堪自老相  
尋好也須忘却長安道

又

戊戌年夏送庚午同年李晉卿令宜興

二十九年如一夢鹿鳴筵上笙歌動今日長安  
尊酒共遙相送行春好醉張公洞但得閭閻  
無疾痛莫嫌枳棘棲鸞鳳自古循良非小用須

珍重他時爲作甘棠頌

又

送蘇舜澤副使提學江右

鐵筆峩冠袍繡豸雲中上黨威名在紫綬縮章  
金作帶增氣槩文星一點明江介顧我非才  
官鼎勳業無成容鬢改後學晚生今有賴期  
遠大須君着眼驪黃外

渙家傲

送吳龍津給舍擢江西少參時龍津使朝鮮初回云彼國有夢予記之以詩者

妙年青瑣才名動陽春正爾看鳴鳳萬里親將  
龍節捧勞傳誦東夷聞有尚書夢奉使歸來



明主重福星又遣臨章貢樓下紫薇花滿洞群  
仙共清詞一曲遙相送

菩薩蠻

贈越南濱貳守

寶劍藏鋒真國器三晉當年曾攬轡驄馬避行  
行中朝聞直聲 謫官頭未白好作江南客且  
莫歎窮途功名屬丈夫

又

送聞人副使銓之湘南

昨夜都門新過雨秋水秋風生路渚有客正南  
行圖書畫舫輕 文昌連執法芒采光如月路  
已近衡陽思君湘水長

浣溪沙

送皇甫員外謫官

三十年前夢竹樓楚雲湘水憶黃州天涯今日  
送君遊 漫道賈生年最少不應王粲獨悲秋  
江湖難解范公憂

又

送費推官之嶺南

莫厭西南道路長丈夫膂力正方剛之官仍買  
過家航 桂嶺春煙籠橡櫺鷺溪秋水浸桃榔  
憐君青鬢坐黃堂

又

送王石沙侍御按閩

白石青沙海嶼連吳門秋月映娟娟美人家住



太湖邊 潞渚波光涵日月 幔停峯影浸風煙  
豸袍畫舫羨登仙

又 送裴憇中令永安

昔日少年今老翁 長安花下一尊同 不堪分手  
又匆匆 我欲歸來尋舊隱 有誰相伴臥雲松  
憐君作宰萬山中

又 寄汪得之憲副

當年揮翰鳳凰池 青瑣翱翔又一時 憐君江海  
獨棲遲 虹井臥龍今作雨 方塘野鶴少人知  
憐君寄我送兄詩

又 送唐宰牧之武寧

鳧趨丹陛御爐邊 鵠立橋門壁水前 十年京國  
共稱賢 單父琴清廬阜月 河陽花滿大江煙  
幾時飛鳥早朝天

法曲獻仙音 壽揚給事中母七十

籬菊苞金井梧鳴玉 江影靜涵新鴈 暑退高堂  
涼生廣榭 畫閣晝開清宴 共報道寶婺星中夜  
光璀璨 天南現 太安人鶴髮朱顏 酌春酒 遶  
膝孫曾歡戀 七十生辰 見青瑣賢郎 貴顯丹桂  
五枝 比燕山未應多羨 揮玉堂彩筆 賦得仙音



遙獻

憶舊遊

送邵主簿之同安

記石佛巖前烏龍山下王氏新莊柴門臨水曲  
有一林修竹數畝池塘幾共蕭蕭夜雨坐對短  
檠光歎如流歲月從頭屈指四十經霜 相望  
念先公有遺祠尚在往事堪傷惜藻川舊學試  
同安一簿白首爲郎却媿紆朱拖玉素食坐巖  
廊愛富春山色桐江煙水近吾鄉

蝶戀花

送族弟臣赴廣德守

樓前楊柳雨初晴長河新水平南風五月彩舟

輕天涯送爾行 楊子渡石頭城大江天際橫  
萋萋芳草不勝情遙天一鴈明

越溪春

送吳少叅龍津廼  
尊院使公還毘陵

陽谷仙翁滄海客踪跡滿天涯御榻當年曾入  
夢 賜袍帶名動京華白首辭官青雲有子拂  
袖還家 天風吹上星槎春日別煙霞金尊銀  
燭長安夕玉堂裏坐對簷花我欲買田陽羨與  
翁同煉丹砂

又

送楊憲副景周南還

紫袍金帶歸來平高臥舊江鄉羨汝東溪溪水



上風煙好喬木蒼蒼隔斷紅塵坐移白日一曲  
滄浪 長安數載相望秋日送歸航我欲畱君  
君不住故園遠鄉話偏長無限青山懷抱空慚  
白首岩廊

錦堂春

次未齋韻送陸侍  
御瑚便道壽母

臘日慈顏初度繡衣北闕馳情鳳凰臺下煙花  
簇計是過家程 鶴髮鸞章日映錦堂綠酒春  
生霜毫寫罷江南曲紫閣正平明

千秋歲

賀漸齋生辰

西山雨後枕簟新涼透華月滿空如白晝錦堂

明絳蠟瑞靄飄金獸聽金縷千秋一曲爲公壽  
六七丈夫兒不數燕山竇長安夜今朝酒莫  
惜醉如泥杯到休停手如公少人間五福兼而  
有

又

壽費氏悅母孺人

南山秋老黃菊都開了節近重陽天氣好金尊  
浮綠蟻玉醴薰龍腦蟠桃熟西池王母來青鳥  
丹桂兩枝芳蘭茁靈芽早稱家兒真國寶共  
羨太夫人福履人間少宴蓬萊海山日上扶桑  
曉



行香子

合楊正郎儀惠古今詞抄

獨坐燈前清興翛然覽新詞盡是遺編風流谷  
老豪宕坡仙最愛他氣格高辭鋒健意機回  
太白臨川一代稱賢歐陽子千古爭妍詞場三  
昧妙理難傳真箇是下詩壇入畫品出文筌

南山壽

賀吳山泉憲副六十

望南躔一星光映三階有仙翁紫袍金帶佳辰  
海上筵開數流年纔周花甲論風采獨步霜臺  
晚歲功名諸郎科第占却人間五福借違瞻祝  
青天岱岳翁壽益崔巍還歌詠日升川至山有

臺萊 美吾鄉蘇山甘水鍾靈輩出奇材念當  
年東山燈火幸此日北闕風雷契重金蘭情深  
葭玉廊廟江湖共此懷念同庚初度與翁不得  
共啣杯佇看取喬遷赴闕 丹詔飛來

萬年歡

二首 和答白下史恭甫慶予六十之作

昨夜西堂見南斗光中文昌輝映曉啓泥緘錦  
軸瑤篇稱慶念子清才誰並真江左詩仙草聖  
惜壯年早輟經綸慚愧調元造命 託根自正  
原不比和露天桃倚雲紅杏傲雪青松獨立煙  
霞僻境千里同聲相應况高誼此時堪敬寄心



期玉女峯前約訪孤山和靖

又

千古高情愛王氏堂槐陶公門柳說甚補天扶  
日祗憑赤手廿載龍顏左右嗟綠鬢而今白  
首喜年華花甲纔周正是還山時候勳名何  
有看世間幾箇詩人也堪不朽畱取精神做箇  
太平迂叟春酒年年爲壽旋采摘野肴山藪更  
浩歌一曲滄浪長與溪翁爲偶

桂翁詞卷之四終



桂翁詩卷之五

沁園春

嚴陵感舊

石壁溪頭富春山下畫舫新來正雨過青山波  
生碧渚千峯日照兩岸花開北郭池塘東門  
柳二十年前幾往迴重登眺愛風煙如畫臨水  
樓臺 追思少日情懷長記在先人舊郡齊向  
范老祠前春風走馬客星亭上雪夜觀梅往事  
分明故交零落歎急光陰 瞬哉佇立久念白  
雲芳草欲去徘徊

又

甲午除夕



燭華堂金尊綠酒  
心戀主滿懷情  
未建况是明良際會  
柄闌干一生竊祿胡  
念瑣闥封章時揮彩筆玉堂視草日侍金鑾庭  
下三槐階前五桂春雨秋風次第看昇平世一  
人有慶萬國同歡  
安漫白首思親丹  
闌節序堪驚動庸  
望台階平正斗  
幾度冰霜到歲寒

減字木蘭花 二首 睡起

夢迷江雨睡起不知紅日午欹枕沉吟喚醒當年吐哺心  
案頭黃卷恰似從前都覽遍懷

慵開那得知音好客來

又

午窻睡起南風忽送西山雨小坐憑軒又報催  
詩吏打門時拈藥裹多病欺人年老大底事  
關心可是商家濟旱霖

又 咏盆池荷花

圓荷的歷一朶高花圍衆碧承露團團絕勝仙人掌上盤  
孤妍綽約未數千葩并萬萼幽意誰知小小盆池也自宜

又 二首 漫成



晴雲突兀萬疊奇峯天上出晚吹清涼一陣紅  
蕖水面香 坐來無暑昨夜北山何處雨節去  
如流明日西風又報秋

又

無人知道世上難逢開口笑往事堪悲一日風  
波十二時 翻雲覆雨眼底紛紛何足數流水  
高山不對知音且罷彈

又七月六日晚出閣偶占

黃扉盡日吮墨研朱揮彩筆晚出龍樓眉月青  
天掛玉鉤 涼生碧樹白玉河橋東畔路誰道

官閒身在蓬萊未是仙

又壬寅春考一品九年滿感述

九年一品素食真慚糜國廩七載黃扉目斷青  
山未拂衣 憂多先老只有辭官歸即好 聖  
主恩深犬馬難忘戀闕心

木蘭花令 睡起感事

閉門那管風和雨無奈黃鸝啼碧樹一場春夢  
竟難明千里家山更何處 懷抱無端誰可語  
閒拈世事從頭數愁如急浪滾將來身似弱雲  
飛不去



又 初夏即事

花落知經夜來雨曉起清陰生綠樹風和門外  
馬嘶時日暖樓前沽酒處 紫燕雙雙梁畔語  
似把流年向人數羞將勲業對青銅閒看浮雲  
自來去

滿庭芳

午日

雨過階除風來簾幙午窓清夢初回端陽節近  
滿院海榴開細數盆池荷蓋雕梁畔燕子飛來  
醒睡眼卿雲五色晴繞鳳凰臺 故園當此日  
蘭舟競渡畫鼓如雷有芳洲草閣綠水縈迴只

爲 君恩深重誰知是補袞非才烏帽底早堆  
華髮中夜對三台

又 春思

微雨催花穠煙釀柳韶光又近清明閒門要路  
芳草一時生北鴈翩翩南去故園隔千里含情  
東風裏可人清聽新轉上林鶯 玉堂春晝永  
游絲乳燕相逐輕盈將彩毫頻試漫寫生平惟  
有丹心戀 闕江湖夢幾度難憑攬青銅漸看  
華髮歲月迅堪驚

踏莎行 七夕



隔歲佳期相逢今夕銀河暗度流雲濕底須烏  
鵲爲填橋天孫自有支機石 乞巧樓高長生  
殿寂人間私語天應識等是區區兒女情古今  
畢竟難明白

無俗念

次虞文靖公韻

長笑掀髯筭宇內幾人真是豪傑同醉同醒同  
夢覺踪跡電光興滅六代繁華五陵豪貴轉眼  
都消歇何如勘破一毫不與干涉 人生底許  
光陰纔見春花又早看秋月歲歲年年開更謝  
今古幾番圓缺誰是誰非誰清誰濁盡付旁人

說夢回雞唱斗杓斜挂城闕

大江東去

和東坡韻病起閒述

一臥經旬喜百事無營祇須藥物病起渺然思  
澤國興在黃樓赤壁五老煙空九華雲淨濤湧  
三山雪長江如塹閱來多少英傑 却想江左  
風流五陵豪貴過眼春花發屈指千年如一日  
歛忽風休電滅對鏡慵看倚樓長歎一任添華  
髮寸心炯炯清觴坐引秋月

又

春日喜雪

新春前後見三白真是 皇家瑞物萬里江山



同一色晃漾銀城鐵壁田父增歡都人咸喜相  
慶今年雪瓊樓玉宇望中掩映雄傑 長安景  
色堪誇指瑤林琪樹依稀梅發寂寂千山飛鳥  
靜野逕人踪稀滅素奪鷗群皓迷鶴嶼翠失長  
松髮元宵節近交光應待明月

又謝蘇立翁壽儀

南極老人龜鶴鹿都是長生之物範取精鏐成  
妙質羅列錦屏東壁朱李沉冰紅桃綉日瓜剖  
雕盤雪黃金爵注壽山千仞高傑 玳筵水陸  
交陳銀燭瑤觴滿座笙歌發簾動水晶風乍入  
不覺炎氛銷滅杯引長春堂開初壽烏帽籠玄  
髮佳辰歡對鳳樓東畔涼月

漁家傲

感述丁酉七月

一介書生逢 聖主十年諫草人爭覩滿目風  
波渾不顧思砥柱也曾獨障狂瀾住 孤忠久  
被奸邪妬 君恩深重難拋去明日辭官還上  
疏 天應許白圭免受青蠅汗

又

恭承

御札有感

一札十行勞

聖主龍光照室驚看覩自念草



紫蒙 眷顧官國柱豈容身向山林住 聖明  
既已知讒妬小臣何敢言歸去袖中更有匡時  
疏還自許也知白璧終難汗

阮郎歸

次歐陽公韻

小樓臨苑對青山朱門草色間隔花時有珮珊  
珊鞦韆揚柳間 新綠暗亂紅殘慵妝低翠髮  
日長春困減芳顏無人獨倚欄

又

北河舟中

夾隄楊柳碧參天官河直似弦綠波渺渺泛樓  
船西風夕照前 青渚暗白沙圓聞鷺鷥鷺鷥

芙蓉秋水映娟娟歸心鴻鴈邊

浣溪沙

夏日

宮漏沉沉夏日長雨餘殿閣晝生涼南風微送  
苑荷香 草閣拋書移白日竹床欹枕聽滄浪  
夢寬時復到江鄉

又

暮春

庭院沉沉白日斜綠陰滿地又飛花岑岑春夢  
繞天涯 簾幕受風低乳燕池塘過雨急鳴蛙  
酒醒明月照牕紗

又

雨不止



閉門連夕雨聲寒曉起蕭蕭更倚闌清如茅屋  
住江干天際陰雲橫作陣泥中莎草亂成團  
長安大道幾時乾

又送世行第京邸賀壽南還

老子今年六十齡三千里路慶初生一家兄弟  
見君情初壽堂前槐影密三台樓下桂香清  
鄉心先與白鷗盟

迎春樂春日閣中間述

五雲深護黃金閣玉漏盡開魚鑰傍龍墀時聽  
鈞天樂春日暖看紅藥才踈自愧叅帷幄經

幾度詞頭封駁却喜太平年門館靜閒鈴索

醜奴兒觀閣前芍藥有感 二首

玉階暖日翻紅藥綽約娉婷色艷香清獨倚薰  
風畫不成鈴索畫閒宮漏靜綠樹啼鴛午夢  
初醒自起看花遶閣行

又

昨日盛開今日少一朵當軒靚色娟娟却比繁  
英更耐看明歲而今花又發蝶攘蜂喧玉砌  
雕闌物態人情似轉圜

又疊韻同前



玉堂何用栽紅藥穠萼娉婷那似人清攪亂梅  
花夢不成 自有看花人道好愛聽流鶯醉眼  
偏醒掉臂花前挾彈行

又

階下幾株紅芍藥曉起開軒露萼嫵娟錯認蓮  
花著意看 道人已罷看花興燕雀休喧不去  
凭闌收拾閒心學坐園

鶴冲天

二首

初夏

黃梅雨綠楊風徙倚畫樓東踈踈槐影暎簾櫳  
薔薇滿架紅 小池臺深庭院正是日長人倦

碧紗厨裏睡忺時流鶯枝上啼

又

臨水閣倚風軒細雨熟梅天一池新水碧荷圓  
榴花紅欲然 薄羅裳輕紉扇睡起綠陰滿院  
曲闌斜轉正閒凭何處玉簫聲

蘇幕遮

夏日閣中

白玉堂黃金閣簾捲薰風階下翻紅藥墻角黃  
薇花半落宮漏沉沉晝靜喧簷雀 算人生何  
處樂遇 主遭時日日霑恩渥定知無福也難  
消合把丹心向日同葵萼



玉樓春

次周美成韻

何年不踏長安道，整頓乾坤濟時了。水邊時伴鷺鷗群，竹裏日教賓客到。南園日暖尋芳草，坐愛溪荷搖翠葆。日長無事即神仙，未信朱顏容易老。

齊天樂

夏日閣中

層城盡日宮雲覆，高閣靚深無暑。埤竹陰清，垣梧影靜，昨夜鳳池新雨。香凝燕寢，喜愠解朱絃，涼生白苧。時排錦牋，彩毫隨意賦詩句。自念寒生一介，平步陟丹霄，遭逢英主。渭水綸竿。

幸郊耒耜何必當年伊呂，有懷自許，但勲業無成。光陰易去，攬鏡婆娑，聽梁間燕語。

丹鳳吟

端午次周美成韻

荏苒端陽節，屆梅雨蒸軒，荷風薰閣。綠槐庭院，飛燕乍穿簾幕。朝來雨霽，微寒猶襲。宮扇紈輕，朝衫羅薄。喜值天家開宴，玉醴仙蒲，霑醉鳳樓東角。因念君恩深重，此際頓忘懷抱。惡笑渠薄伎，倆似洪鑪點雪，禁甚銷鑠。春花過眼，歲自開還，落祗愧元非調燮。手這機衡，難握浮雲富貴，却幾曾戀著。



蝶戀花

夏日閣中

雨過紅雲覆苑牆  
龍池草色芳  
隔花宮漏下  
偏長  
人間白玉堂  
綠樹靜  
碧荷香  
葵心赤  
向陽  
五弦天上  
舜琴張  
南薰殿  
閣涼

菩薩蠻

迴文 秋夜

碧空秋浸涼  
雲夕微月澹  
輝輝  
露含花濕露  
幽閣傍  
螢流

風入松

大虞文靖公韻賞閣前芍藥

玉階紅藥弄晴酣  
高閣對華簪  
朝回便是看花處  
雕闌畔  
不着遊驂  
應詔頻揮彩筆  
承恩

疊賜羅衫  
鳳池新雨水  
如藍梁燕畫  
喃喃喚  
醒一枕還鄉夢  
情脉脉  
千里空緘  
何日乞身歸  
去看雲水北山南

浪淘沙令

二首

鎮日抱瑤琴  
獨坐沉吟  
出門無處覓  
同心彈盡  
高山流水調  
沒箇知音  
歲月苦侵尋  
華髮盈  
簪  
迂踈原合住  
山林只爲君  
恩深未報  
惆悵而今

又

世事信難憑  
堪嘆人情一團笑  
裏暗藏兵  
只爲



區區微得失喪了平生 日夕苦蠅營開闢縱  
橫等閒蝸角便相爭開口向人談義利那箇分  
明

訴衷情 次荆公韻

龍樓鳳閣五雲間 每日一登攀 自念平生遭際  
敢忘却寸心丹 年漸老 性貪閒 鳥知還 琵琶  
千仞靈峯萬疊夢在家山

滿江紅

次東坡韻 題嚴陵釣臺

七里灘頭幾度過 漁磯傍側愛江鄉 山闊雲閒  
水清沙白 簑笠當年甘寂寞 儀容此日增顏色

激頽風軒冕等浮塵 先生力 故人意 君王識  
天度大 凡襟窄 只是腹相加 幾人容得深淺交  
情貧富見古今 人品天淵隔 嘆江湖落落少相  
逢知音客

又 次呂居仁韻

象麓草堂何處在白芒洲 曲有負郭東泉當年  
書屋碧嶺千層盤 翠黛清溪一帶流 寒玉對萋  
萋芳草 一川平煙中綠 南山下 東籬菊北窓  
外 西潭竹靜 隔斷紅塵 那知榮辱少 日儘多林  
壑 趣中年遊遍天涯 足到如今把世態 人情看



教熟

蘇武慢

次文靖公韻

龍口巖前白芒洲畔長憶往時游釣一別青山  
十年紫禁驀地位躋三少瑣闥封章玉堂視草  
金殿屢承 丹詔首鵷班玉帶朱衣無日不瞻  
天表 荷 君恩報答無能勲庸未建敢學歸  
雲倦鳥日晏彤闈平明紫閣獨立太清天杪大  
旱為霖巨川作楫整頓乾坤都了那時節拂袖  
還山高臥海天春曉

臨江仙

貴州東坡書院次林見素韻戊寅年作

百尺清泉聲斷續半巖松竹青青丹厓翠壁列  
雲屏入山行解帶掃石坐翻經 憶過西湖楊  
柳院六橋載酒揚舫天涯離恨不堪聽萍踪隨  
處寄塵夢幾時醒

又

壬寅六月望日次醉翁韻是日立秋

今日西風初送暑碧梧已動秋聲高樓一望暮  
山明白雲飛處迢遞客愁生 目斷征帆江上  
盡幾人遙掛歸旌天涯芳草綠波平柴門何日  
拄杖小橋橫

鷓鴣天

西山靈巖寺和元耶律丞相韻劉洞中石



人世滄桑有變遷靈巖玉洞自巋然朝衣幾共  
遊山日佛界猶存刻石年嗟歲月惜風煙等  
閑花發又啼鶻只將彩筆題僧壁玉帶畱來朝  
日邊

桂枝香除夕次荆公韻

煙塵滿目正木落燕山天寒氣肅北望居庸疊  
翠萬峯雲簇黃金臺上當時月見幾度征旗矗  
矗米合潭沱風寒易水不堪駐足笑車馬少  
年追逐歎慷慨悲歌古調難續青史功名只是  
一場榮辱七國英雄俱寂寞但歲歲花香草綠

禁園除夕揮毫聊和桂枝舊曲

西江月三首次朱希真韻

歲月急如流水功名虛似浮雲何須勞苦百年  
心行止由來是命豈得人情勝舊從教世事  
更新笑談且與俗相親好惡胷中自定

又

對景不妨頭白逢春且放眉開莫教閒事惱心  
懷容忍些兒何碍塵土難尋道侶山林應屬  
竒才朱衣翠袖兩邊排不似柴門自在

又



白日如如兀坐中宵栩栩酣眠興來臨水更看  
山懷抱了無縈絆 不要許多榮利只圖此子  
清閒麻絲草履布衣衫學箇道人打扮

摸魚兒

次晁無咎韻懷豫章舊游

憶少年作客洪都幾度西山南浦徙倚滕王高  
閣上落日風帆遙聚凝望處愛匡廬煙中瀑布  
如川注鳥歌花舞向孺子孤亭雲卿舊宅時復  
携游去 悔當時錯把蟾宮高步荏苒青春虛  
悞朱衣玉帶黃金殿忘却丹丘玄圃笑匆匆綠  
鬢已成絲彈指能幾許春來自語且酌酒花前

放歌溪上不管青山暮

卜算子

夏日閣中

紅藥映階翻 一角黃薇謝又見盆荷出水圓容  
易春還夏 漏永麝煙銷畫靜朱簾下高閣清  
涼午睡濃半餉揮毫罷

水調歌頭

中秋夜和東坡韻

今夜中秋月獨坐對高天休問古今圓缺心賞  
自年年更上小樓南望千里故園何處風露九  
霄寒把盡長安酒不似在林間 傍花吟隨鶴  
舞伴鷗眠但得身閒無事何用月長圓少日功



名富貴老去江湖丘壑出處道須金丹心將皓  
月秋水共娟娟

少年遊

懷桂洲書院

舊築草堂周遭碧水宛在象山陽二十四巖花  
明竹媚真個是仙鄉 洲渚玲瓏江草碧鷗鷺  
自成行靜倚吟筇閒移釣艇萬事罷思量

桂翁詞卷之五

終



桂翁詞卷之六

壽仙翁


寄賀太宰張用川誕辰

渠荷凝碧海榴舒赤正節近端陽五日日月湖  
邊敞笙歌綺席光映壽星南極帶束金犀鶴  
錦新裁宮織喜烏帽籠頭未白好為蒼生大展  
經綸力永作明廷柱石

酌江月

四首 和答大司寇  
顧東橋見寄

黃扉十載掌絲綸補袞調羹非手自愧才疎如  
鞿線小器豈堪大受一代賡歌百年禮樂賴明  
明元首格天帝業毫髮贊襄何有獨慚鳳閣





鸞臺揮毫載筆忝竊夔龍後平地風雲遭 聖  
主未羨磻溪釣叟大馬衰齡山林倦翼莫報  
君恩厚稽首焚香中夜遙瞻北斗

又

誰將秀句譜新詞堪羨橋翁妙手多謝高情傳  
密意一咲開懷領受歲月頻經風波盡歷此日  
方回首功名勘破畢竟於吾何有 自憐少日  
風流登臨賦咏肯落他人後碌碌紅塵三十載  
不覺慚成老叟南谷松篁北山猿鶴相見頗殊  
厚從今穩臥一室翛然如斗

又

靈山山下葛溪濱風景不殊疇昔乍覩城西新  
賜第突兀瓊恩寶澤玉帶雕麟緋袍繡蟒不類  
山林迹花開客到休咲平章舊宅 自憐多病  
微軀放歸田里獨奉 君王勅共道熊羆當入  
夢莞簟已安家室多謝橋翁瑤篇遠寄麗藻真  
詞伯筵開湯餅專邀江左仙客

又

清詞曾寄楚江頭俯仰又成今昔想見當年揮  
彩筆搖動三江七澤丹桂洲前青雲樓下賸有



煙霞迹靈巖玉洞真是神仙窟宅 何時雙鳥  
飛來一筇相伴共領看山勅却把平生諸翰墨  
畱記名山石室我愛橋翁江南才子一代文章  
伯山中無事芳尊但少佳客

漁家傲

寄李蒲汀

丹桂洲前梅雨霽平沙水煖鴛鴦睡楊柳池塘  
荷點細扶殘醉風前黃鳥多幽意 忽憶故人  
天北際碧山樓下蟠雙檜一架葡萄水晶碎驚  
夢寐西鄰學士詞偏麗

永遇樂

題松石退齋圖壽宮詹陸儼翁

轟轟喬松巖巖巨石蒼顏古色長共東風不隨  
流水貞心自識年年歲歲沾濡雨露厭飫煙霞  
冰雪摩層漢百尺龍鱗俯千尋立壁 有箇仙  
翁儼如山嶽獨挺歲寒標格我愛丹青分明畫  
出妙手真難得節近中秋會逢初度北斗光瞻  
南極但願翁柱石明堂光華壽域

沁園春

寄倫白山祭酒

虎觀詞臣鸞坡學士昭代英儒記寶帶垂金光  
生北闕玉堂振鐸名重南都夢遶橋門書來鈴  
閣又道文旌返舊廬經年隔望海雲縹渺嶺樹



模糊 鏡中鬢髮蕭疎却自咲形容非故吾但  
賴得 天恩罷歸田里獲從初服依舊耕鋤後  
樂園中堂開丹桂草長池塘春雨餘譜新詞託  
惠連遠寄聊寫區區

又 次汪得之寄韻

數載懷鄉幾番抗疏此日歸休喜紫閣彤庭拂  
衣長謝丹山碧水策杖閒遊樓起青雲堂開綠  
野丹桂依然香滿洲煙霞裏詩盟酒約日日堪  
酬 尋花問柳優游更不管人間歲月流念千  
載遭時真逢堯舜百年致主獨愧伊周綠鬢詞

臣烏鬢元宰又得青山對白頭北窻下臥聞啼  
鳥不聽鳴騶

又 寄沈韓峯侍御

驄馬循行玉堂話別屈指經年正南浦懷人綠  
波春水西風送客落木秋煙我到東山君居北  
闕塞鴈江鴻又各天頻問訊望鍾陵明月相憶  
娟娟 茅齋日晏高眠時步履支筇野水邊喜  
林鳥如呼歸來可樂沙鷗作伴相對堪憐惟有  
丹心渾忘白髮春夢長依 黼扆前願故人好  
力持舟楫弘濟商川



又別李龍洲侍御用原贈韻癸卯春

天上歸來重尋舊隱桂樹芳洲喜驄馬東巡梅  
花歲晚畫舫西下柳色江頭把贈春詞畱連夜  
酌尚憶前時侍 袞旒又誰料華堂綠酒共醉  
南州 如君海內名流况氣壓西江第一樓看  
執法芒寒烏臺清夜文昌輝映蟾窟高秋白髮  
閒身故人青眼長吟何妨守一丘山林裏有漁  
樵可話風月堪詠

又送李潛用大理還金華

短棹乘流輕軒度嶺風雨兼程念走馬看花當

年識面避人焚草往事關情三十年來四千里  
外廊廟江湖白髮生喜今朝有故人遠到春滿  
山城 後園丹桂堂成正露冕扶筇踏曉晴看  
竹徑煙濃春迷鶴夢橫塘水靜晚結鷗盟佳客  
難畱好懷未盡又向江頭話送行凝望處愛高  
雲樓閣青眼偏明

又送倫彥群饒部道舊

白玉階前黃金殿側多士克庭愛賈誼敷陳經  
綸蘊籍董生條對禮樂縱橫老子當時已曾括  
目識爾文章有法程果然是家傳夙學海內知



名拜官遠別神京有戀戀相知一日情想躡  
屐鍾陵看山力健連床伯氏夢草詩清舊里柴  
門新開竹徑得子相過眼倍明春夜宴芳園桃  
李把酒頻傾

又贈余侍御勉學謫起松江二守

尚記當年春闈校士見子看花念路入錢塘君  
方作縣林藏象麓予亦還家白簡霜威皂囊風  
力獨步南臺衆所誇乘驄日遇風波滿地流滯  
天涯相思夢遠長沙更悵望蒼梧嶺樹賒咲  
廁席師垣濫竿座主無能薦引空抱咨嗟經濟

高才江湖壯氣竹帛敷名未有涯葛溪上有白  
頭知己拭目煙霞

又送蘇舜澤提學

寶墨樓前賜麟堂上一別三年喜學有師承文  
章丕變士多矜式禮義相先振起儒風激昂晚  
進洙泗門墻得正傳共道是有蘇公條教白日  
青天 蹇予謝政歸田正欲訪匡廬五老煙柰  
白鹿洞中難畱地主紫薇花下忽送神仙便省  
東齊舊遊西晉一點文星入紫躔重分手記華  
堂丹桂綠酒歌筵



又登葛仙山飛昇臺作

萬仞岡頭平臨四望人世奇觀正宿雨初收流  
雲散亂渾如滄海浪湧濤翻時見群峯參差隱  
現髣髴蛟鼉沒巨瀾太空裏長煙繖繖積霧漫  
漫 下方塵土敲煩到此處方知宇宙寬看立  
壁中開劍光猶迸古苔剝落鶴跡仍完身在層  
霄分明上界何用凌風跨玉鸞昨宵臥神遊八  
極不覺超凡

又送吳龍津太守廼尊賜谷翁還毘陵

玉女潭頭張公洞口好段煙霞記往日尊前長

安有約何年此地同煉丹砂飛鳥雲間拂衣天  
上幾陣秋風送到家忽報道有仙翁駐節太守  
公衙 相逢一咲天涯指玄圃滄洲路未賒把  
萬種丹經從頭參透玄關一竅認取無差犬吠  
白雲鸞啼修竹策杖春江送去槎更看取待銀  
蟾秋滿丹桂生花

又送朱鳳泉秋官北上

玉瓚清儀朱絃逸韻文采超群羨蚤歲登科英  
華振發名區作宰惠愛流聞簡召秋臺班趨曉  
陛鄉曲衣冠共五雲驚老眼念一時佳士幾許



如君 當年扈蹕南巡記春日相看袂忍分正  
爾向山中養成經濟我從天上輟却綵綸丹桂  
堂中靈溪橋畔綠樹清江日未曛相送好喜遊  
山得伴別酒成醺

浣溪沙

寄贈高雲川侍御按關

大廷曾見董生文丹鳳樓前已識君果然鷓鴣  
出風塵 兩淞乘驄豺虎遁三山攬轡島夷聞  
好將經術策奇勲

又

別鄉同年傅大尹朝縉

三十年前聽鹿鳴憐君文采冠時英幾回同賞

上林鶯 獨對雲林開草閣漫勞風雨駐江城  
沙頭別酒看春晴

又

贈歙縣吳監生自東

先公作宦古齊東此地當年見汝翁恂恂敦樸  
古人風 六十四齡聞抱汝今朝見汝與翁同

迺父方齋六十四生自東貌甚肖予見之喜焉昨宵偶爾夢羆熊

又

送鄭環浦僉憲

去年京國一相逢道上行人已避驄果然鵬翮  
秋風 老我一區依葛水勞君兩度訪靈峯  
春波畫舫又匆匆



又 送何同知士鰲

富春山下碧溪長，昭德祠前草樹香。  
勞君三載護甘棠，聞道兒童畱別駕。  
誰教風雨送歸航，眼中清濁付滄浪。

又 送前溪曾憲副之黔中

浮雲逝水自縱橫，白日青天老眼明。  
憐君萬里獨南征，雨過前溪添草色。  
花飛上苑自鶯聲，野翁無限惜春情。

又 贈吳中書昇

草閣蕭蕭對碧山，野翁中夜夢龍顏。  
一庭春

雨長苔班，溪上群鷗堪作伴。  
林間倦鳥自知還，憐君兩度叩柴關。

減字木蘭花

送放秋官貴之

門生座主却愧歐公知，貢舉羨子才華白玉堂。  
中對衆誇十年粉署兩制詳，刑聲獨著政事文章。  
大業行看柱廟廊。

又 送岑蒲谷少參

南宮粉署文采當年聲已著，西省薇垣方岳人稱德業尊。  
林泉衰老兩度相逢情話好，春日江頭折柳何堪送去舟。



又題俞翁生諤夫扇

瑤峯如畫樓觀夕陽明落木草閣臨流占斷溪  
山十里秋林迴路轉野客扶筇歸去晚好段  
風光畫出青山綠野堂

又贈進賢萬生世芳

葛溪溪上繡嶺翠峯簇相向梅雨初晴百里看  
山眼倍明與君攜手綠野青原開咲口龍虎  
山中有約登臨一醉同

臨江仙壽黃疇亭副郎七十

山谷老人年七十百花潭上優游石亭草閣枕

江流携琴隨野鶴移席傍沙鷗東澗甘棠思  
邵父南都畫省名畱一瓢春酒醉林丘神仙行  
陸地何用訪瀛州

大江東去壬寅秋南歸登金山作

砥柱乾坤鎮長江萬古中流獨立橫過驚濤排  
駭浪直負擎天巨力吞吐煙雲奔騰日月壯觀  
東南壁三山海上孤根不與同植蛟宮貝闕  
玲瓏海色浮空日抱龜鼉出人代光陰如一瞬  
只有滄波不息吞海亭前江天閣上目送飛鴻  
翼振衣長咲墨華醉灑巖石



壺中天

次韻初歸述懷

解組歸來擬種秫荒田采芝空谷散誕已無名  
利累野性頗同麋鹿抵冒風波淹留歲月豈爲  
千鍾粟久懷丘壘幾度傷心欲哭誰想今日  
溪山重尋游釣里社仍分肉三十餘年塵土夢  
勘破人間榮辱夏賞清池春遊芳野秋飲東籬  
菊煙霞深處高臥不嫌矮屋

法駕導引曲

書葛仙飛昇臺

丹厓上丹厓上立壁倚青冥赤霧濛濛迷翠壑  
白雲杳杳漾滄溟巖下走雷霆

西江月

題醒齋

舉世昏昏醉夢幾人心眼惺惺山牕春睡正冥  
冥想見高齊喚醒江上雨雲滕閣湖邊煙水  
徐亭莫將喧寂撓虛靈便是黃庭內景

又

癸卯元夕

寶澤樓前月滿瓊恩堂後花明耳邊簫鼓起江  
城元夕故園風景去歲今宵內苑承恩賜  
宴觀燈人間天上最關情却咲萍踪無定

滿江紅

北河舟中少作

岸柳窺人東風裏似曾相識指長堤朱箔青樓



還如舊日前度劉郎今又到落花流水成陳迹  
但萋萋芳草滿江湄青如織 風月夜思疇昔  
雲雨夢無消息正一鴈南來今夕何夕仙鳥不  
傳雲外信誰家苦弄風前笛倚蓬窗搔首對黃  
昏空追惜

如夢令

題畫四首十六歲作

門外東風何早一夜海棠開了料峭五更寒人  
倚闌干清曉鴉噪鴉噪忙問落紅多少

右惜花春起早

庭院月明清影露下瑤階風冷斗轉與參橫人  
在梧桐金井夜靜夜靜坐對不知更永

右愛月夜眠遲

寶月碧空纔展玉指銀盤新盪孤影落清波欲  
把廣寒搏轉休歎休歎人與嫦娥不遠

右掬水月在手

花覆鞦韆影裏翠袖雕闌斜倚纖手探花枝弄  
落一天紅雨香氣香氣薰透遍身羅綺

右弄花香滿衣

菩薩蠻迴文

弋陽道中十九歲作  
逐句迴

落鴈寒汀煙漠漠流水野塘秋路幽藏古樹明



月伴人行

念奴嬌

中秋對月次李漢老韻十六歲作

南樓獨倚悄無人  
唯見五湖煙綠  
桂樹香生  
吹欲下疑是九天零粟  
萬里無雲  
長空一色處處  
袁安屋數聲羌笛  
青鸞飛在庭竹  
人在瑠樓  
玉宇指點江山  
幾處飛泉瀑  
安得滄江都是酒  
洗我愁思千斛  
天將老我鶴髮成仙  
月下跨黃鵠  
姮娥今夜共誰談  
笑如玉

又

素娥風采倍精神  
萬頃琉璃深綠  
狂把金尊眠

未得管甚玉樓寒粟  
共訝清光萬間同照  
誰更歌茅屋鳩鵲無依  
三遶一庭修竹  
醉後青眼  
摩挲清流萬丈  
看銀河橫瀑  
記得嫦娥曾許我  
金粟秋香千斛  
水晶宮裏環珮聲清  
不用乘黃鵠  
明年此夜誰共一輪寒玉

又

隔歲佳期向此夜  
試把金樽斟綠  
據我胡床三弄  
笛簌簌桂華零粟  
光滿瑤樓  
寒生銀瓦  
是處神仙屋  
虛簷影轉  
坐來風動  
庭竹露華冷  
浸衣巾  
銀潢低瀉  
倒掛長空  
瀑何處  
簫聲驚鶴夢



滌盡塵襟千斛步雪歸來乘風飛去底用驂鸞  
鵠廣寒宮殿箇人應念如玉

桂翁詞卷之六終



鷗園新曲目錄

癸卯元夕宴丹桂堂曲

後樂園獨酌曲

春日遊東園曲

秋日過水東山莊曲

夏日白鷗園泛舟曲

端陽日白鷗園與客泛舟曲

閒遊白鷗園曲

白鷗園漫興曲

初秋池上納涼曲



小閣納涼曲

環漪亭納涼曲

中秋八角塘泛舟曲

白鷗園對雪曲

鷗園新曲目錄終

鷗園新曲

癸卯元夕宴丹桂堂曲

山花子

老臣此日歸田野爭看宰相還家玉堂中風月  
頗佳堪酬物色年華合上元時風光可誇歌喉  
宛轉舞袖斜太平行樂未有涯坐聽江城簫鼓  
家家

青山綠樹真幽雅朱門未羨豪華桂堂中情興  
最佳芳辰滿汎流霞前合

春花春月真瀟灑華筵燈火交加畫堂中風物



儘佳光連竹樹橫斜前合

山林濁酒真堪把田園依舊農家草堂中懷抱  
其佳不妨笑傲煙霞前合

去年勅賜天閑馬錦袍侍宴天家念微臣  
榮幸有加聖恩浩蕩無涯合

幽風亭下傳仙竦教坊歌吹誼譁看華燈明星  
彩霞萬條火樹銀花前合

人間萬事真飄瓦風波宦海無涯向山林藏烟  
隱霞紅塵不染東華前合

佳辰與客傳杯葷德星光聚五家畫堂中紅燭

影斜留連對月看花前合

去年禱早歌幽雅應時霖雨隨車喜秋成田收  
穰稔芄芄滿地桑麻前合

狀元亭上多幽雅山川棟宇增華稱尋春山巔  
水涯歸來翠幃風斜前合

### 金錢花

元宵景物堪誇堪誇華堂燈火交加交加歌金  
縷舞仙娃拚沉醉樂無涯賓客散斗杓斜

### 尾聲

樓臺燈影開圖畫花月簾櫳映彩霞把陽春挽



取散與江城百姓家

後樂園獨酌曲

二犯傍粧臺

丹桂野堂開錦衣天上今日得歸來且暫作溪  
山主又說甚廟廊才白頭喜共松筠老烏帽從  
教鷗鷺猜合一人林下四時酒杯清風明月可  
徘徊

後樂小園開柴門竹徑時有故人來身世外無  
妄想吟弄處有餘才桃源遠尋漁父引沙席閑  
憑野老猜合

花下一尊開自觴自咏不許俗人來且放下調

羹手那裏有濟川才天邊倦鳥宜歸早海上輕

鷗莫浪猜前合

懷抱向誰開十年舊事和雨上心來愧迂儒難  
用世蒙 聖主獨憐才孤忠自許神明鑒拙直  
宜招時輩猜前合

春日遊東園曲

憶多嬌

花滿園草滿園密密垂楊覆短簷小小軒窗春  
晝眠興味蕭然做箇人間懶仙



風滿軒月滿軒裊裊爐香透碧簾短短瑤琴相伴眠情興悠然做箇人間散仙

山滿前水滿前矮矮柴門流水邊兩兩沙鷗相對眠白髮飄然做箇人間老仙

樽滿前杯滿前灑灑香醪如密酣栩栩時來甕底眠醉後頽然做箇人間酒仙

又

春日暄春景鮮春徑春堤春草芊春谷春林春鳥喧合春色堪憐休把青春等閑

春雨綿春水連春岸春江春浪添春樹春雲春

夢牽

合前

春嶺前春浦前春柳春花春晝妍春鶯春鶯春

杜鵑

合前

春氣酣春興偏春舞春歌春滿筵春酒春燈春

月圓

合前

秋日過水東山莊曲

駐雲飛

曲逕疎籬小結茅堂住水西門掩山光翠路遶

溪流細啾鷗鳥對忘機蓼花灘底一曲滄浪夜

半歌聲起正是先生醉醒時

二〇六十一

鳥園新句

四

李耀



野渡漁磯錦石踈花碧水隈黃葉紛飄墜白鳥  
時來去唳山外夕陽西蒹葭秋水細雨斜風波  
浪橫江起正是先生罷釣時

竹戶柴扉籬巷陰陰綠樹圍背郭青山倚隔水  
紅塵避唳草色映書帷白雲堆裏屋角鳩鳴紅

日三竿起正是先生睡穩時

斗室幽棲山靜林深燕雀稀日永簾垂地風定

鑪煙細唳一領混元衣蒲團藉體俗慮塵緣不

向靈臺起正是先生打坐時

夏日白鷗園泛舟曲

錦堂月

首夏清和閑來遊賞園亭竹樹陰濃水漾銀塘  
蘭舟載酒臨風日初長柳過三眠春已老花如  
一夢合笙歌擁不妨夜半歸來月明相送

追省位極三公黃扉九載一朝謝却千鍾橫翠

亭前時時拄笏雲峯臨水岸長伴鷗群眠竹牖

渾忘蕉夢前合

試聽綠樹陰中黃鸝調舌真能換羽移宮野渡

停橈波濤謾自奔騰任從爾年少多情誰解我

至人無夢前合



畢竟萬法歸空神仙那有回頭便是英雄白石  
清泉四時杖屨從容杯中物且自開懷身外事  
休教入夢前合

醉翁子

吟弄有明月清風可共更酒友詩朋笑歌喧哄  
非縱這林下逍遙廊廟江湖事不同合金尊捧  
揆沉醉花前此樂無窮

夜靜聽簫鼓林塘響動看楊柳煙迷芰荷風送  
誰共向臨水樓臺人在溪山罨畫中前合

僥僥令

瑤觴拚酌酌檀板唱玲瓏一任譙樓玉漏催銀  
箭翠袖舞香風燭影紅  
江湖徒耿耿歲月任匆匆醉向蘭舟坐待東方  
白明月滿長空興轉濃

尾聲

而今勘破繁華夢野服山中伴老農一咲朱顏  
藉酒紅

端陽日白鷗園與客泛舟曲

排歌

碧酒金尊蘭舟桂槳園亭景入端陽海榴花蹙



絳綃囊紫艾青蒲送遠香歌喉細舞袖長中流  
簫鼓奏宮商花林畔竹嶼傍迴船驚起錦鴛鴦

又

玉樹堂前白鷗園上青蒲水滿迴塘薰風時送  
芰荷香紫燕飛來傍酒觴芭蕉碧萱葢黃綠槐  
乍展午陰涼龍舟競畫鼓長闌干閑倚看人忙

又

綠水銀塘朱簾畫舫閑中載酒徜徉青天白鳥  
影茫茫四面遙山護短墻携茶竈對筆床拋書  
欹枕聽滄浪娟娟淨冉冉香紅蕖翠篠映波光

又

黃閣歸來綵綸罷掌又經兩度端陽閒將吟咏  
對清觴佳客相過興欲狂園亭景雲水鄉白頭  
人醉白鷗傍笙歌沸羅綺香太平風景勝陶唐

金錢花

佳辰又是端陽端陽遨遊綠水池塘池塘牽錦  
纜繫牙檣荷香細柳陰涼歌金縷進瑤觴  
醉回月滿林塘林塘籠燈列炬交光交光歸深  
院過迴廊賓客散漏聲長情不極樂無央

尾聲



明朝更約同新賞一任人誇綠野堂暫把鷗園  
作醉鄉

閑遊白鷗園曲

四邊靜

白鷗園上風光好樓臺傍池沼玉樹醉堂深環  
漪坐亭小鴛鴦頸交芙蓉花笑與客泛蘭舟一  
樽共傾倒  
賜閑堂上風光好琴樽伴花鳥苔徑入林深竹  
房傍池小清風可招明月自照與客坐吟詩挑  
燈到天曉

蓬萊閣上風光好風煙勝三島一水抱城隅千  
峯出林表青山可樵綠波堪釣無事獨凭闌滄  
溟望中小

醉春堂上風光好春來被花惱桃李易成陰徑  
路多芳草鶯慵燕老蜂喧蝶鬧無計可畱春閑  
情向誰道

剡歙兒

風光好處人難到溪雲山月有誰招閑人古來  
少福緣怎消谷葛巾布袍田翁野老朝夕相從  
農談不了



園林風月無邊好尋詩呼酒任逍遙青山共難  
老歲月儘饒前合

尾聲

憑君莫話長安道池上風煙堪畫描感謝 君  
恩賜歸早

白鷗園漫興曲

步步嬌

歸去來兮山林下風月真無價閑居閱歲華暮  
往仍朝春來還夏筭來枉被利名牽何如且共  
漁樵話

沉醉東風

愛溪山天開菴畫向田園爲農學稼共佳客挈  
壺觴引清風招皓月那肯戀高車駟馬甌宴滿  
車農場纔罷與鄰翁醉歌幽雅

忒忒令

早晚向山巔水涯徘徊處松間竹下任人道這  
白鷗園何殊綠野黃金印腰間懶掛喜的是陪  
鶴舞伴鷗眠不管人間的歲華

雙蝴蝶

愛他釣磻谿姜子牙愛他陶朱公泛若邪愛他



漢張良辭家愛他嚴子陵富春山下愛他陶淵  
明白蓮入社愛他陳希夷睡老西華

園林好

愛的是花下小車喜的是沙邊釣槎厭的是塵  
中車馬閑來時叩禪家熏鑪畔一甌茶

川撥棹

談空罷說一會浮生閑話看見童戲捉柳花看  
兒童戲捉柳花有時節巾車獨駕向前村問酒  
家任風吹落帽斜

漿水令

賞東園花枝低亞飲西亭杯流紫霞坐南樓明  
月影斜臥北牕清風滿榻隨時隨處樂無涯索  
強如待漏趨朝退食開衙歌聲罷舞袖斜醉來  
月上葡萄架身外事身外事不須縈掛天教俺  
天教俺管領煙霞

尾聲

園林風月真瀟灑贏得閑情玩物華任詩人敲  
門月下只說道山翁醉了也

初秋池上納涼曲

八聲甘州



金風送暑頓涼生池閣夜來新雨芙蓉漸老銀  
塘半落紅衣墻頭月上林影低照見蘭舟向晚  
移金樽滿玉漏稀畱連歡賞夜忘歸雲光斂露  
靄霏遙看大火已流西

秋宵暑氣微看畫樓東角斗轉星移長空雲淡  
露華漸覺沾衣山亭寂寂螢火飛池樹寥寥烏  
夜棲踈簾下燭影低迴船載得月明歸漁磯靜  
林逕迷角聲孤起子城西

園林風露凄聽高城擊柝漏靜人稀輕雷過雨  
西山爽氣侵衣風林葉動山鳥啼水冷池塘鷗

鷺飛秋宵好涼思怡絳紗籠燭夜深歸梧桐樹  
影漸低樓頭月轉畫闌西

涼宵景自奇見銀河清淺白露凝暉蒹葭秋水  
川途有客褰衣田翁野老無是非竹密林深靜  
掩扉南樓上寒望迷天邊倦鳥已知歸芙蓉好  
照水湄舉杯邀月大江西

遍園林皆秋意冰簟涼生白苧衣今夜裏夢遶  
蓬山思欲飛

小閣納涼曲

玉交枝



夜涼如洗望長空銀河漸低樹頭涼吹蕭蕭起  
闌干月影頻移流螢拂檻點點飛石邊流出泉  
聲細台渾不覺炎天暑時恍疑在蓬萊弱水  
池塘過雨芰荷香蘭舟晚移蓬窻待月鈎簾起  
波光竹影依依長空萬里星斗稀露華涼沁侵  
衣袂台  
前

瓊樓玉宇廣寒宮宸遊到時彩毫揮動 龍顏  
喜夜深手把天衣九霄風露灑灑飛遙空星斗  
當簷際台  
前  
波澄太液侍 宸旒龍舟晚移水晶簾動荷香

裏 御前鳳蠟輝輝金鰲橋下煙柳迷堆雲洞  
口山光翠台  
前

環漪亭納涼曲

山花子

綠陰深處池亭小荷風細納香飄映湘簾波光  
動搖坐來暑氣全消台看樓頭月掛柳梢夜涼  
如水銀漢遙涓涓玉露零九霄絕勝飛仙鶴背  
風高

銀塘夜泛蘭舟小綠波深處停橈晚風輕翠竹  
影搖坐來涼思蕭蕭台  
前



樓臺倒影波心小  
城頭夜漏迢迢倚闌干  
塵襟頓消脫巾素髮飄蕭前合

綠楊堤畔漁磯小  
橫塘新水平橋雨纔過涼生  
苧袍不須羽扇頻搖前合

### 醉翁子

還將明月招更喜清風好  
愛此夜深時不覺衣襟涼透也  
望蓬萊可到不知弱水路迢迢合想  
瓊樓雲深霧杳便乘鸞飛去從此上青霄

夜涼河漢遙天靜露華峭  
把酒問長空不覺山頭月出也  
看銀蟾晃耀不知今夕是何宵前合

### 尾聲

層冰赤腳徒狂叫短壑青松路匪遙  
都不似俺獨坐池亭暑自消

### 中秋八角塘泛舟曲

### 駐雲飛

月影波光天水相連蕩渺茫  
玉兔瞻天上把酒同相向嗒  
身世是何鄉好懷須放玉樹堂前金  
縷休停唱合但願年年共此觴

雲影天光今夕中流泛渺茫  
人在江湖上北斗遙相向嗒  
山水愛吾鄉桂花纔放橫翠亭前醉



聽山童唱前合

林影山光却笑桃源是渺茫秋色來天上牛女  
空相向前合風景勝仙鄉芙蓉花放雲水軒前一

曲滄浪唱前合

簾影燈光隔岸樓臺浸渺茫載酒蘭舟上笑語  
歡相向前合廿載滯他鄉舉杯休放明月樓前且

聽鷓鴣唱前合

白鷓鴣對雪曲

畫眉序

日晏掩重關斗帳高眠稱幽懶喜山童報道雪

滿西園寒壓倒竹折腰長白滿顛松埋髮短合  
攬衣獨上層樓望瓊瑤萬里漫漫

曉起望柴關雲黯長空散飛霰喜樓臺上下掩  
映鷓鴣園歡賞處酒泛金杯清興發茶烹玉碗前合

白鶴唳松關雪壓千峯望中遠喜揮毫授簡賦  
憶梁園憐謝女吟咏飄揚笑党姬唱斟低淺前合

風雪掩茅關玉宇瓊樓起瞻戀喜山翁無事高  
臥丘園光烟爍玉映窓紗寒凜冽銀鋪堦面前合



嘉靖丙午仲春常熟  
後學生陳堯文重刻

鷗園新曲

終

戊戌之秋汴承譚出理楚黃時

桂洲元相贈之以詞弁以

內閣所錄一編眎之曰吳匠氏善梓爾歸其謀  
諸且爲我紀之乃郡守王公儀樂任其事汴也  
校而刊焉夫詞固樂府之流而聲歌之餘也是  
故詠物之辭婉攬景之辭麗述情之辭豔諷事  
之辭莊不以博極而該不以研思而工故綴文  
之士猶或病諸而鴻筆巨卿所不棄而弗爲者  
也若公之宏博載於紬史嘉藻發於賡歌典則  
陳於講幄愷直形於疏奏觀茲編者合公應制



扈蹕諸集宣金石被管絃乃知天之生公將以  
鳴盛世而緯國華不徒詞人之甲乙而已梓諸  
吳吳之人詠而興焉首被雅化是故侍御陳公  
蕙采風我土遂樂董其成云是歲冬十月旣望  
後學皇甫汸謹識

跋桂洲詞後

桂洲詞製於元和相桂洲翁密勿之暇玄思雅致  
經世華國作者鮮儷焉先是侍御陳公蕙曾刻  
之吳吳之人珍傳之嗣扈

蹕渡河諸詞未布也時侍御樊公得仁按歷畿  
南風紀之餘雅重文教廼亟命遷高曰子知夫  
桂翁扈

蹕諸作乎其言指而遠其事肆而隱其理典而  
則颯颯乎大雅之稀音也有裨世教多矣盍併  
刻之以溥厥傳遷高弗毅祇若命焉竊唯瓏珠



和璧爲世通珍之至也妙典妙謨與世  
言之善也元相翁製作一出傾動詞林樂相侈  
美謂非言之善而寶之至者乎雖然此特其緒  
餘耳豈足以盡翁哉若夫啓沃之良賡歌之美  
謂布之誠謂憂之忠吁俞之謨峻偉之業則固  
足以垂竹帛而勒嵩彝自有天下之信史書之  
豈直唯文詞已哉

庚子歲冬十月望月大名府知府後學石遷高  
謹識